

倘
湖
樵
書

倚湖燕書二編卷之七日錄

二編自七卷至十二卷

蕭山

父集輯

牡丹芍藥之瑞

荔枝靈異

詩文得力

文章療疾

附書筆療疾

水紋

水色

相馬

龍降之應

龍吟之應

降生之瑞

梁顥詩 他書有考而未詳

東坡考亭之號各有原本 附洛翁

聲氣

秦將

歷代田名各

并田名田分田民田
華田代田爰田王田

五經應試

儒家測數

診夫知妻墓子蔭父

頂日挨月

草木泉石蟲魚之誨漁者

龍虎助軍威

漢晉行服

禽獸之蠶

護堤侯

分界

石生石長

地水脉相通



牡丹芍藥之瑞

牡丹芍藥花之麗者真不負富貴花之目乃有歷而
極麗者其爲花之祥瑞而傳留爲盛事也清波雜志
云楊州多芍藥而黃腰號金帶圍初無種城中有時
而出則當有宰相韓魏公爲守一出四枝公自當其
一選客具樂賞之時王岐公爲倅王荊公爲屬皆在
席缺其一莫有當之者會報過客陳太博入門亟招
之乃秀公也酒半折花歌以插之四公後皆爲首相
焉 雙槐歲抄云文淵閣右植芍藥有臺相傳 宣

廟幸閣時命工砌者初植一本居中淡紅者是也景
泰初增植二本純白居左溪紅居右舊常有花自增
植後未嘗一開天順改元徐有貞許彬薛瑄李賢同
時入爲學士居中一本遂開四花其一久而不落旣
而三人皆去惟賢獨留人以爲兆明年暮春忽各萌
芽左二右三中則甚多而彭時呂原林文劉定之李
紹倪謙黃諒錢溥相繼同升學士凡八人賢約開時
共賞首夏四日盛開八花賢遂設燕以賞之時賢有
玉帶之賜諸學士各賜大紅織衣且賜晏因各純白

者曰玉帶白深紅者曰宮錦紅淡紅者曰醉仙顏惟
諫以足疾不赴明日復開一花衆謂諫足以當之賢
賦詩十章閣院宮寮咸和藻成曰玉堂賞花集賢序
其端亦引魏公故事以爲榮 細素雜記云洛陽牡

丹無若陳州之盛園戶植花如種黍粟動以頃計政
和壬辰春園戶牛氏家忽開一枝色類鶯雛而淡其
面一尺三四寸高尺許柔葩重叠約千百葉其本姚
黃也而于葩英之端有金粉一縷暈之其心紫蕊亦
金粉縷之牛氏乃命爲縷金黃以蓮篠作棚屋圍障

復張青繒護之于門首約止行人人輸千錢乃得入
觀十日之內而其家獲數百千郡守聞之欲剪以進
御衆園戶皆言不可曰此花之幻者不可爲常他時
復索此品何以應之又欲移其根亦以此爲辭乃已
明年花開果如舊品矣又蘓長公記東武舊俗每歲
四月大會于南禪資福兩寺芍藥供佛而今歲最盛
凡七千餘朵皆重跗累萼繁麗豐碩中有白花正圓
如覆盂其下十餘葉稍大承之如盤姿格絕異獨出
于七千朵之上云得之于城北蘓氏園中此與牛家

牡丹並足傳異者 王文正遺事云宋仁宗于後苑
曲燕步于檻中自剪牡丹兩朶召王文正公曾親戴
有中貴人白公言此花昨日上選賜相公已于別叢
擇下花請相公躬進公乃取花因斟一卮同獻上大
喜引滿以杯示公羣臣皆榮之 古今記云老人村
有牡丹碎王漑序謂牡丹高數十丈牡丹如錦蓋花
開盈一尺范至能詩十丈牡丹如錦蓋人間姚魏敢
爭春 宋類苑云泰州西溪鹽舍卽海陵監也呂文
靖公彙簡嘗官于此手植牡丹一本于署中有詩云

異香穠艷壓羣葩何事栽培近海涯開向東風應有
恨憑誰移入五侯家范文正公希文蒞監和云陽和
不擇地以角亦逢春憶得上林色相看如故人後人
因二公詩筆續和尤多而花亦極貴重護以朱欄不
忍拘折歲久榦尚數丈每春時花開少亦數百朵
湧幢小品云宋淳熙三年二月如臯縣桑子河堰東
孝里莊園有牡丹一本無種而生明年三月花盛開
則紫牡丹也有杭州觀察推官東過見花甚愛欲分
一株掘上溪尺許見一石如劍長二尺題曰此花瓊

鳥飛來種只許人間老眼看遂不敢移以是鄉老有
生辰值花開時必造花下飲酒爲壽間亦有約明日
造花所而花一夕凋者多不吉惟有李嵩者三月八
日初度自八十看花直至一百九歲而終焉 廣客

談云吳逸谿名性誼構李人家貧力學明春秋常中
浙延祐丁巳鄉舉先是所居城廬手植牡丹一本多
年未花是歲之前臘月忽作一花顏色鮮美無異暮
春時士大夫相率來觀其門如市來秋八月吳公領
鄉薦人以爲此花之徵 澠水燕談錄云晁文元公

迥在翰林以文章德行爲仁宗所優異常曲宴宜春殿出牡丹百餘盤千葉者纔十餘朵所賜止親王宰臣眞宗顧文元及錢文僖各賜一朵又常侍宴賜禁中名花故事爲親王宰臣卽中使爲插花餘皆自戴上忽顧公命內侍爲戴花觀者榮之 龍城錄言洛

人宋單父字仲孺善吟詩亦能種藝術凡牡丹變易千種紅白鬬色人亦莫能知其術上皇召至驪山植花萬本色彩各不同賜金千餘兩內人皆呼爲花師西湖志餘云蘇子瞻通判杭州時有牡丹記叙一

篇其畧云熙寧五年三月二十三日予從太守沈公
觀花于吉祥寺僧守墳之圃圃中花千本其品以百
數酒酣樂作州人大集金盤綵籃以獻于座者五十
有三人飲酒樂甚素不飲者皆醉自輿臺皂隸皆挿
花以從觀者數萬人可謂盛矣 陳眉公云宣和七
年牡丹皆開作金色又變黑色此必災也 贛州呂氏
手植白牡丹于洪武六年冬十月冰雪中盛開狀若
盤盂照耀風日 按以上所載名花爲富貴壽考福
澤之祥矣而朱平涵又云嶺南無牡丹移植不花花

卽不利其主梁文康之孫中舍紹績携至家花開召
客飲疾發卽殞易數主皆然則又不祥莫大焉何哉
纂要云明皇時沉香亭畔木芍藥一枝二頭朝則
深碧暮則淡黃夜則粉白晝夜之內香艷各異帝曰
此花木之妖者也以賜楊國忠國忠以百寶爲欄焉

荔枝靈異

按荔枝譜云其熟時未經採摘蟲鳥皆不敢近或已取之則蝙蝠蠅蟲蟻爭來蠹食此雖似有靈然凡菓亦多爾不爲其異也宋公荔枝樹極高大實如陳紫而小甘美無異或云陳紫出宋氏世傳其樹已三百歲舊屬王氏黃巢兵過欲斧薪之王氏媼抱樹號泣求與樹偕死賊憐之不伐宋公名誠公者老人之稱年餘八十子孫皆仕宦太平廣記王媼荔屬宋氏名宋香旣被巢寇下斧以後結實雖千萬一一若有斧痕

焉又莆田方氏有樹結實數千顆欲重其名以二百
顆送蔡忠惠公給以當歲所產止此公爲目之曰方
家紅著之于譜印證其妄自後華實雖極繁茂逮至
成熟所存者未嘗越二百遂成語讖龍牙荔枝者荔
枝之變怪者也其殼紅可長三四寸彎曲如爪牙而
無瓢核全樹忽變非常有也筆談謂焦核荔于土人
能爲之取本木去其大根火燔令焦復植于土以石
壓之勿令生旁枝其核自小凡此皆荔枝之靈異也
若十八娘荔枝色深紅而細長俗傳閩王王氏有女

第十八好畝此品因而得名將軍荔枝五代閩有爲
此官者種之後人以其官號其樹而失其姓名之傳
狀元紅荔枝舊名延壽紅宋元豐間狀元徐鐸公所
植也公與楓亭薛奕以文武雙魁遂結婚媾故授其
種于薛而楓亭之地宜荔故狀元紅出于楓亭者特
珍此皆因其人而名之非有所異也 惠安邑志謂
果實之類與百穀相消長荔枝楊梅大熟其年五穀
多荒諺曰山中紅田裏空何子謂不然荔枝火種也
花不耐雨雨多則花落荔枝大熟必其年不雨耳

筆記云余溪罷相居福州第中有荔枝初實絕大而
美名亮功紅亮功者溪家御書閣名也靖康中溪謫
建昌軍旣行荔枝不復實明年溪歸荔枝復如故此
亦靈異 纂要云廖衡琮之子字致平登熙寧進士
第至朝議大夫家有荔枝二樹實綠而味甘黃庭堅
與友善號爲綠荔廖氏後人因稱之以別其族

詩文得力

後漢文苑傳杜篤少博學不修小節不爲鄉人所禮
居美陽與美陽之令遊從請託不諧頗相恨令怨收
篤送京師會大司馬吳漢薨光武詔諸儒誄之篤于
獄中爲誄詞最高帝美之賜帛免刑 歷代吟譜云
梁劉孝綽辭藻爲後進所宗時重其文每作一篇朝
成暮編好事者咸誦嘗爲詩曰塞上羣鳥返雲中偕
雁歸高祖見大怒卽奪侍郎又爲詩二首其一曰鳴
鑣響夾轂飛蓋倚林廬其二曰城闕山林遠一去不

相問高祖嗟賞復侍郎沈約曰卿以詩失黃門還以詩得黃門孝綽曰此卽旣爲風所開還爲風所落也

詩品云宋監典事區惠恭本胡人爲顏思伯幹顏爲詩筆輒偷定之後造獨樂賦語侵給主被斥及大將軍修北第差克作長時謝惠連兼記室參軍惠恭時往其安陵嘲調末作雙枕詩以示謝謝曰君誠能恐人未重且可以爲謝法曹造造大將軍見之賞嘆以錦二端賜謝謝辭曰此詩公作長所製請以錦賜之顏魯公撰宋璟神道碑云公長松篇梅花賦

蘓味道以爲有王佐之才劉禹錫云宋廣平之沉下
寮也蘓公味道時爲繡衣直指使者廣平投以梅花
賦蘓盛稱之自是則天聞之全唐詩話云鄭州李
日知景龍初爲相初安樂公主館第成中宗臨幸晏
從官賦詩日知卒章曰所願但知居者樂無使時稱
作者勞獨以規戒他日謂曰向時雖朕亦不敢諫非
卿亮直何能爾卽拜侍郎江西通志云贛縣王奇
字漢謀少爲縣吏令題詩于屏云隻隻銜蘆背曉霜
盡飛鷄鷺立寒塘奇密續日晚來漁棹驚飛去書破

遙天字一行令異之因激使學後遊京師真宗偶見

其所作詩召見賜第奇自慶以詩云不拜春官爲座

主親逢天子作門生官至殿中侍御史

事文類聚又言其詩是雁

聲不到歌樓上秋色偏欺客路中

又任濤高安人早有詩名時常

侍李騰觀察江西聞其有露漙沙鶴起人臥釣船流

之句特免其役鄉民援例訴之騰判云江西界內有

詩似濤者並與免役無敢應者咸通登進士雲溪

友議云元和十三年下第者多爲詩以刺主司獨章

君孝標爲歸燕詩留獻庾侍郎承宣其詩口舊壘危

巢泥已落今年故向社前歸連雲大厦無棲處更傍
誰家門戶飛庾得詩展轉吟諷誠恨遺才乃候秋期
必當引薦庾果重秉禮曹孝標來年擢第羣議以爲
二十八字而致大科則名路可遵遞相礪礪也 王
泉子云劉瞻之父名景寒士也十歲許在鄭絀左右
主筆硯至年十八九絀爲御史西巡荆部商山歇馬
亭俯瞻山水時雨新霽巖嵐奇秀泉石甚佳絀坐久
起行五六里曰此勝槩不能吟咏便晚何妨卽停于
亭欲題詩顧見一絕染翰尚濕絀大訝其佳絕時南

北無行人顧左右但同來劉景在後二三里公戲之
曰莫是爾否景拜曰實見侍郎吟賞起予輒有寓題
引咎又拜公咨嗟久之止回京闕戒子弟涵瀚已下
曰劉景有奇才他日文學必超異自此可令與汝共
處于學寢饋一切無異爾輩吾亦不復指使三數年
所成文學皆詞理優壯凡再舉成名公召辟法寺學
省清級及生瞻及第 溫憲員外庭筠子也僖昭之
間就試于有司值鄭相延昌掌邦貢以其父文多刺
時復被毀制士抑而不錄既不第遂題一絕于崇慶

寺壁後榮陽公登大用因國忌行香見之惘然動容
暮歸宅已除趙崇知舉卽召之謂曰某頃主文衡以
溫憲庭筠之子深怒嫉之今日見一絕令人惘然幸
勿遺也于是成名詩曰十日溝隍待一身半年千里
絕音塵髣髴如雪心如死猶作長安下第人

全唐
詩話

王翬見聞近錄宋慶曆初歐陽永叔余安道王素俱
除諫官蔡君謨以詩賀曰御筆新除三諫官喧然朝
野競相歡當年流落丹心在自古忠良得路難必有
謀猷裨帝右直須風采動朝端世間萬事俱塵土留

取功名久遠看三人以其詩薦于上尋亦除諫官時
謫爲一棚鴝 宋史范鎮少時賦長嘯却胡騎晚使
遠遼人相目曰此長嘯公也 侯鯖錄云熙寧中鄭
俠上書事作下獄悉治平時所往還厚善者晏幾道
叔原皆在數中俠家搜得叔原與俠詩云小白長紅
又滿枝築迷場外獨支頤春風自是人間客張主繁
華得幾時俗陵稱之卽令釋出 墨客揮犀云盧秉
侍郎常爲江南小郡司戶叅軍于傳舍中題詩云青
衫白髮病叅軍旋糶黃糧換酒尊但得行錢留客醉

也勝騎馬傍人門王荆公過而見之尤極稱賞俄蘆
千朝數年間遂超顯仕 石林詩話劉季孫初以左
殿直監饒州酒王荆公爲江東提刑巡歷至饒按酒
務始至廳事見屏間有題小詩曰呢喃燕子語梁間
底事來驚夢裏閒說與旁人渾不解杖藜携酒看芝
山大稱賞問專知官誰所作以季孫對卽召與之語
嘉嘆遂升車而去不復問務事旣至傳舍適郡學持
狀立庭下請差官攝州學士公判監酒殿直一郡大
驚遂知名云 許彥周詩話云王君玉內翰初登第

調揚州縣令題九曲池云越調隋家曲當年亦九成
哀音已亡國廢沼尚留名儀鳳終沉影鳴蛙祇沸聲
淒涼不可問落日背蕪城晏元獻閱詩賞嘆薦爲館
職聞中今古錄云奉化應方伯履平登洪武庚辰
進士除授福建德化知縣三年考滿吏部試論一篇
文雖優而貌頗侏儒不得列乃題詩部門之前云爲
官不用好文章只要鬚鬚及胖長更有一般堪笑處
衣裳纒得硬綱綱不書姓名關者以此呈冢宰冢宰
曰此必應知縣也取其文覽之果高次日奏陞考功

司郎中越三年出爲常德知府又二年陞貴州按察使終雲南左布政 名賢錄詹鼎字國器台之寧海人方國珍開府慶元求士爲已用鼎匿不出國珍聞其才以計獲之不得已因爲盡力至正末我兵臨慶元城下國珍懼乘樓船入海 上怒欲舉兵誅之國珍莫爲計鼎爲草表謝辭甚恭而辯 上讀表曰孰謂方氏無人哉是可以活其命矣乃赦不問更以國珍爲右丞鼎亦召至京師 四友齋叢說云顧祿字謹中爲太常典簿以事當法 太祖初行洪武正韻

世人尚未遵用祿自陳所作詩皆正韻 太祖取視之果然遂得釋故至今稱爲經進集云 懸筭瑣探云况鍾爲蘓州守鄒亮獻詩二十首鍾稱賞欲薦于朝會有以匿名書數亮過失潛揭于府治大門者鍾得書笑曰彼欲阻吾薦正速成亮名耳遂奏亮可用召試官驗授吏刑二部司務轉監察御史 餘姚志云餘姚胡惟彥號淳朴居鄉以耆德見推元季之亂隱居行義明興舉遺逸上太平頌 太祖覽而悅之命賦早朝詩十章立就稱旨拜湖廣叅政懇改兗州

知府在郡一年政平訟理 楊文貞公士奇頗愛士
仁廟一日幸文淵閣曰今之山林亦有知名之士乎
公曰東吳有陳繼者善爲文卽召之繼至吏部擬授
國子博士入謝 上曰此當在禁近乃改翰林五經
博士繼字嗣初公初未嘗識夏忠靖公治水蘇邵得
繼文以歸公偶見之耳 蘇談楊文貞薦達士類多
踐清華如吾蘇一郡蓋有三人焉尚書楊仲舉都御
史吳訥五經博士陳嗣初仲舉與文貞在武昌爲患
難之交訥黑窰匠以一文嗣初教書儒生以一詩見

知昔入啓事悉登臺閣 紀畧云革除二年正月召
河州衛吏目解縉還爲文淵閣待詔董倫薦之也先
是縉謫河州過華山題一絕云謫宦西來登華嶽黃
河東去一秋毫可憐閒却擎天手萬古雲霄日月高
帝聞之故召 永樂中 上在北京有白鵲之瑞南
京各衙門例皆進表時楊士奇以病在告監國表命
庶子贊善撰呈稿東宮不懌命蹇義持示士奇曰甚
寂寥且不著題以賀白龜白鹿皆可命士奇改士奇
改一對云蓬金門而送喜馴彤陛以有儀增一對云

與鳳同類踰踰于帝舜之庭如玉其輝翬翬在文王之囿義以進東宮喜曰此方是帝王家白鵲適內厨進膳遂命中使陳昂撤以賜士奇 閩書嘉靖二十七年劉邗憲以貢士任高安訓導奔母喪途遇劇盜詢知爲邗憲能誦其試文甚悉歎服護歸 薛寘字持志昌國人以聖人執權賦領鄉薦調衡陽簿時史彌堅帥淮南一日寇起黑風洞檄寘往撫諭將至有道其姓名者其首曰非四明作聖人執權賦之薛寘耶遂投戈而逝 周南林纂要云蜀張俞逢蓬萊廟

留詩云玉帝樓前鎖碧霞經年培養牡丹芽不防野
鹿踰垣入銜出宮中第一花又云金玉樓臺插碧空
笙歌迭響入天風當時國色并春色盡在君王顧盼
中俞宿漚泉夢青衣童子曰吾海仙之侍命召予俞
曰何人童子曰蓬萊第一宮太真也引至洞與仙排
徊云感君詩妙敬增壽一紀

文章療疾

附畫筆療疾

水經注云王延壽字子山有異材年二十而得惡夢
作夢賦二十一溺死湘川其夢賦序曰臣弱冠嘗夜
寢見見物與臣戰遂得東方朔與臣作罵鬼之書臣
遂作賦一篇序夢後人夢者誦讀以却鬼往往有驗
漢書王褒爲諫大夫其後太子體不安苦忽忽善
忘不樂詔賜褒等皆之宮處侍太子朝夕誦讀奇文
及所自作疾平復乃歸太子喜褒所爲甘泉及洞簫
頌令後宮貴人左右皆誦之 典畧口陳琳作諸書

及檄草成呈魏太祖太祖先苦頭風是日疾發卧讀
琳所作翕然而起曰此愈我病 蘇東坡題劉壯輿
文編後云今日晨起減衣得頭風病然亦不甚也取
劉君壯輿文編讀之失疾所在曹公所云信非虛語
閩書闔縣高濂字宗呂善書善隸草八分海內時
時軒蓋造之迫則見之不其所能則不得及其醉也
雖尋常人投之楮素懽然揮墨任意縱橫而結構峻
峭 應笑兀醒則雖工意爲之皆所不逮鄉有宋子
者與濂善常病瘧歲餘弗愈一日濂造問之宋強疾

移榻就堂相見因飲之酒酒酣宋出絹素請畫澱染
筆寫菊數本倒垂懸崖江波間香姿隱隱有飄拂流
動之狀宋冷然疎爽因再請復寫奇石亭立雙竹凌
空蕭蕭數葉風韻若有聞焉宋躍起視之毛髮俱竦
是日瘡遂就差 名畫錄云蒲延昌者師訓養子也
筆力道健甚得師法廣政中進書授翰林待詔賜緋
魚袋時感福寺僧禮塔院僧模寫宋展子虔獅子于
壁延昌一見曰但得其樣未得其筆爾遂畫獅子一
圖獻通進王昭遠公公有嬖妾患疔是夕懸于臥內

其疾頓減王公召而問其神異昌云宋展氏子虔于
金陵延祥寺佛殿之內畫此二獅子患人因坐壁下
有愈者梁昭明太子偶患風恙御醫無減吳興太守
張僧繇模此二獅子密懸寢堂之內應夕而愈故題
曰辟邪有此神驗久矣 李陽冰鄂州篆字在江夏
治內相傳篆此字時鬼神泣于空中士大夫爭摹以
致遠謂可禦魑魅 山堂肆考建康有陸溉患瘧醫
療無效有顯光實能者遂命筆畫一獅子令于外榜
之謂陸曰可虔心祈禱當有驗溉如言中夜聞戶外

有憲宰之聲明曰青獅子口臆有血淋漓病乃愈
又秦太虛云予臥病高符仲携摩詰輞川圖示予曰
閱此可愈病予甚喜恍然若與摩詰入輞川數日疾
愈 全唐詩話云有病瘡者杜子美語詩可以療之
病者問云何曰夜闌更秉燭相對如夢寐其人誦之
瘡猶是也子美曰更誦吾詩云子章夢見祖模欄手
提擲還崔大夫其人誦之果愈 淮安府志洪武年
安東郊原每日下午鬼辨千百有聲高帝御製文遣
官訴祭次日即止

水紋

水經註云允街縣故城漢宣帝神爵二年置縣有龍泉出允街谷泉眼之中水紋成蛟龍或試撓破之尋平成龍畜生將飲者皆畏避而走謂之龍泉 山東名勝志云濟南城西金線泉石甃方池泉發其下澄徹見底波心南北有金線一道隱起水面曾鞏詩玉氣常浮灝氣鮮金線不定路南泉無風到底塵埃盡界破冰綃一片天 又蒲昌海有龍城城臨海岸餘溜風吹稍成龍形皆西面向海因名龍城 又天橋

在雲南府城南三十五里觀音大士鑿洞山骨使汧水下趨處也古人謂之石河下斷上聯絕壑溪塹石梁跨之憑虛凌空可渡一人故名天橋橋邊激水濺珠宛如梅樹人呼曰不謝梅亦奇觀也 蜀安縣有銀線潭相傳白龍潛泳其間水面有銀線一痕以物撓之則不見波定如故 廣昌縣德興里石壁出泉白如乳泡沫成佛面各佛面泉 崑仙洞在咸寧縣南洞門高廣其深莫測寒氣襲人有白石如蓂滴水結成龍蛇狀 名山記金線泉在泰安州城西石甃

方池泉亂發其下東注城濠澄徹見底波心南北有

金線一道隱起水面

此與濟南金線池或一脉也

蜀江津縣之

周溪上石磧中有淺水一段周圍五六尺隱隱見雙

金釵影

朝野記畧云金陵鍾山泉滴水皆成梅花

閩書福寧州半洋洲在水底東接龜嶺西接南鎮

如遇風晴見白浪一條長百餘尺又名白玉礁 名

勝志廣東清遠縣峽山東有泡潭其水流動盤旋則

白泡浮游如堆銀浪 又涪州鑑湖上流江心中有

石刻雙魚皆三十六鱗一銜萱草一銜蓮花有石秤

石斗在旁魚現則年豐按魚有時或現則亦水紋之類
羅江在羅江縣治東北兩水相蹙成羅紋故名
陝西洋縣北念佛巖有潭潭面如碧鏡每歲五六
月巳午間忽有泡光出艷異甚常時則無有 山堂
肆考南陽府舞陽縣東南二河南岸有舞水泉其泉
湧躍若舞故名 四川龍州宣尉司東泉瀉石崖噴
激如珠名濺珠泉 一統志奉恩溪在重慶府南川
縣西十餘里溪上流有色如水銀形如白蛇者二泝
灘上下人或以爲寶劍之精

水色

人之恒言曰。青山綠水。則水色固綠。又曰。山青水碧。則水色又碧。綠與碧皆形容其色而不可得。而彷彿言之。掬水細視。有何色哉。然天下之水。固有各具一色。而著名者。請爲分別言之。使有所考焉。

水之具五色者。述異記。睢渙二水。波五色成文。故名續水。名勝志。秀水在秀水縣麗橋東。值天和景明。水光五色。見之者。秀士多擢第。選人輒美遷。常人亦獲福利。程縣程江。以其水自程收鄉來。故名。旁有

百花洲。週迴數百步。相傳洲東有五色水。絢爛如錦。
名錦江。武閭齋陝路記事。旋龔陵三日過浣紗河。
有浣紗廟。伍胥過秦關。遇此女浣紗河濱。胥囑無言。
又叮嚀之女。示胥無恐。投河死。每歲當其沒日。則水
泛漲。五色沸騰。湍流竟日。土人不忍飲其水。湖廣
當陽縣紫蓋山中。分南北二山。頂上四垂若繖狀。林
石皆紺色。下出綵水。甘馨異常。見聞錄云。徐文貞
公階。居近城西隅。湍水日少。湖因自號焉。當公拜首
揆日。少湖水忽作五色。涌起高八尺。踰兩時始息。

一統志淞江城內五色泉相傳葛玄煉丹于此丹成
投水中至今湧泉成五色郡人士見者必擢高第
荊州五色潭水色上浮或成五色

水之黃者莫大于黃河歷數折入中國幾遍寰中元
時遣使窮河源則其初亦清水後合衆流混濁成黃
入中國竟成黃色若置水于器而澄之則黃者俱屬
沙土而非其本色耳 慎蒙名山記云朝鮮金剛山
在慶尚道東萊縣北山頂有石高可三丈上有井圓
十五尺深七寸許有水常滿旱不竭色如黃金世傳

有一金色魚乘五色雲從天而下游泳其中以此名其山 水經注黃水出零陵縣西北連巫山溪出雄黃頗著靈異常以冬月祭祀鑿石溪丈方採得之故溪水取其名 山川記吉安府城中有井出泉二色半青半黃黃者如灰作粥飲有金色而且芬香 一統志天台縣西北有銅溪其水色黃狀如銅色故名水之赤色者莊子所云黃帝遺玄珠于赤水今則未詳何地乃寓言無考也赤水河在貴州畢節道所屬赤水衛城南舊名赤虺唐武后征雲南檄文有赤虺

河卽此虺與水聲相近耳源出芒部經紅土川東流
入川江每雨漲水色淡赤故名 莆田城山有紅泉
在觀察廟後水作紅色林光朝講學之地 山海經
崑崙山丹水出焉西流注于稷澤三珠樹出赤水之陰
吳苑云永寧縣濤山有河水色紅赤有自然石橋
多魚獺異禽時聞犄角聲甚亮 若夫水之變異見
于五行志者斯則一時作幻乃災之大非可常論也
周考王時河水赤于晉龍門三日秦武王三年渭水
赤者三日周昭王三十四年渭水又赤三日後漢安

帝永初六年河東池水變色皆赤如血元初二年潁
州襄城臨水化爲血晉武帝太康五年六月任城魯
國池水皆赤如血安帝元興二年十月錢塘臨平湖
水赤劉聰建元元年正月平陽地震其崇明觀陷爲
池水赤如血赤氣至天有龍奮迅而去齊東昏侯永
元元年淮水變赤如血陳宣帝大建十四年七月自
建業西至荊州江水赤如血禎明中江水赤自方州
東至海後周宣帝大象元年六月咸陽有池水變爲
血國史纂異云懷州地有月水其源出長平山傳云

秦殺趙卒其水變赤因以爲名上在太原知其故諱
改爲懷水武后長安中晉州祠水赤如血唐武德七
年河間王孝恭公輔公祏晏羣將于舟中以金盞酌
江水將飲之則化爲血貞元十七年福州細池水赤
如血長慶元年河水赤三日咸通七年鄭州永福湖
水赤如凝血者三日光啓元年潤州汀水赤凡數日
太中祥符元年五月丁丑泰山王母池水變紅紫色
槎庵小乘云萬曆四十六年四月禮部一本水異駭
觀天心示儆乞聖明加意修省以圖消弭事祠祭司

案呈本月內京師喧傳城河水赤臣等隨于二十五日親詣觀看見西自宣武門外東响閘起至正陽門外御河閘止約長三里許水色盡赤淡紅紫暗狀如積敗之血委係異常相應題請修省云云四十七年四月中長陽門外御河水復殷赤如前時正遼陽三路喪師之候一統志紅泉在涼州衛城東五十里水色微紅又紅水在肅州衛城東南三十里源出衛南山谷中下流與黑水白水合又紅鹽池在山丹衛城南五百里產紅鹽江西紅泉在南城縣麻源

第三谷自砂中流出色紅謝靈運賦訊丹砂于紅泉
宋李程詩紅流停自靈砂液深處應藏九轉丹

水之紫者杜陽雜篇云寶曆元年南昌國獻玳瑁盆
浮光裘夜明犀云其國有酒山紫海酒山之水味如
酒飲之甚醉則經日不醒紫海水色如爛椹可以染
衣其魚龍龜鱉沙石草木無不紫焉 廣東新會縣

大雲山有龍窟其下紫水出宋皇祐間其水變紫者
旬日 廣西貴縣縣南鬱江之旁有紫泉無源偶現
紫色輒符佳應自是邑人每候以爲祥洪武元年十

一月巳未泉出溢流于江其色淡紫光潔可染時葉
琛勅諭交趾州守鄒天琦爲之頌又云其水有兩派
共出其出不常出則有異應自縣門流下者必擢賢
守令或出英俊縣上流下者應在僚屬其水長而狹
色如紫練 紫泉在鬱林州南二里舊名濯纓泉忽
變紫改今名 橫州學前西邊有一穴每遇科舉歲
春分前後微雨時有紫水一道湧出須流過學前則
中舉人必多如不及者止可一人有歲直至州城門
外其年中舉者六人 一統志大同有紫河又陝西

階州境有紫溪漢封璽書用武都紫泥卽此水泥也
水之綠者一統志綠水在長沙府醴陵縣學前其水
湧卽泮池自地脉如絲如霧用白器入水酌而澄之
其水淡綠可以書每出則其歲登科者必多遇雨連
陰則色淡 橫州有綠礬山出綠泉多產礬石 福
寧州有藍溪源出大姥山每歲八月中秋溪水變藍相
傳太姥染衣居民候其時漚藍染帛最佳 上杭縣
南安巖有綠水湖水色淡綠相傳定光佛剎院取水
爲大綠 西湖志云玉泉寺故名淨空院南齊建元

中僧曇超說法于此龍王來聽爲之撫掌出泉遂建
龍王祠祠前有池畝許清徹可鑑蓄五色魚數十頭
游泳如畫其泉溉田千頃傍一小池水翠綠雖以白
粉投之亦成綠色 入蜀紀見云香谿源出昭君村
水味甚美載在水品色碧如黛令人可愛 衡州府
城東有鄴湖其水湛然綠色取以釀極佳晉武帝薦
之太廟吳都賦飛瓊觴而酌鄴醪 耳談云菴畫溪
水于橋左非有山林掩映而水成菴畫染色湛綠可
鑑過橋淡白大異 范石湖云眉州城外江謂之玻

璆江冬時水色如玻璃方夏潦怒濤漲則皆黃流

一統志河南固始縣有溫泉在西南山中其熱如湯

其色綠 又陝西涇州有碧泉洞其中水皆青色四

時長流味苦不堪食 藍溪在泉州安溪縣南源發

萬山中環繞一邑水溪而碧故名 長沙湘潭縣西

南有碧泉天寶間石巖中泉忽湧出色按藍投物水

中皆碧 潯州府城南有淥水在曠野中天然怪石

甃其旁水泉深碧清澄中有巨魚人不敢捕 碧泉

洞在陝西涇州府臨涇縣其中水皆青色四時長流

味苦不堪食 綠泉在滄州久視山下出澄綠水其
泉一百步投之金石終不沉

水之黑者禹貢導黑水至于三危入于南海者是也
程石門漢補云漢張騫言河有兩源一出于闐一出
葱嶺唐薛元鼎云得河源于崑崙之水赤黃黑青水
以方異禹本記言河出崑崙去嵩高五萬里水自積
石三千里而至龍門何見其色以方異耶山海經云
西南流注于醜塗之水黑水出焉禹貢黑水西河惟
雍州華陽黑水惟梁州又曰導黑水至于三危入于

南海三危卽今麗江今滇之瀾滄江潞江二水皆由吐番西北來迤邐入于雲南郡縣之界至交趾入海按名勝志瀾滄江在蒙化府城西南五十里出吐蕃嵯和縣甸南流永昌羅岷山小東至順寧府境崑崙山又東歷景東境入南海卽禹貢所稱黑水是矣迤西之水此爲經蒙氏立國以此爲四瀆之一說畧云水之在雍州名黑水者有六若其入積石河者乃平涼及寧夏衛之黑水而非張掖之黑水志今輿地肅州有黑水南流去積石幾及三百里不與積石相

通此爲禹貢之黑水無疑咸通中樊綽宣慰安南著
爲蠻書曰蠻水之南流入南海者有四曰區宜曰西
洱河曰麗水曰瀾諾江其曰麗水卽古之黑水也又
西洱河與漢志榆葉澤相貫榆葉漸漬成黑又古黑
水祠在益州然此黑水乃成都安縣南之黑水而非
禹貢之黑水也 三水小牘云弋陽郡東南有黑水
河河潯有黑水將軍祠 梁四公記云黑谷之北有
漆海毛羽染之皆黑 廣東始興縣西有墨江源出
翁源縣界水黑如墨韓文公有題墨江詩 蕭縣勝

高之山山陰有黑塢至秋積雨其中染人衣卽成黑色古置黑沙城名本此 史異云陳後主禎明二年四月鄧州南浦水黑如墨宋真宗咸平元年五月撫州王義之墨池水色變黑如雲元至正十七年己丑杭州降黑雨河池水皆黑 泊宅篇云山陰蘭亭有王逸少硯池寺曰天章以藏真廟御製也當時朝廷每有頒詔禮則池水盡黑可以染緇太常少卿沈仲常紀之珍珠船云會稽墨池每朝廷恩命將至池墨必見前後不爽其將見則池際水上浮浮圓結既大

如斗渙散滿池雲舒霞卷烟光粲爛如新研墨下流水復清徹忽三日連發人疑其數謂將無驗未幾太宗真宗仁宗三朝皆至御書 七修類藁云杭州黑龍潭在安樂坊天晴時水色碧綠將雨則先一日變黑故名今訛爲烏龍潭焉 宋沈存中夢溪筆談云漳州界有水號烏脚溪涉者足皆如墨飲之則瘴病行人皆載水自隨梅龍圖素多病預憂瘴癘至烏脚溪使數人負荷之以物蒙首恐爲毒水所濺兢惕過甚忽墮水中自謂必死然自此宿疾頓除無復昔之

羸瘠 楊升菴云黑溪玄牘南荒有黑溪水取其水
以塗石象至輒不去崑崙取以塗身卽能乘象如家
畜古所謂黑崑崙今之象奴也 游宦紀聞云玉乳

泉在丹陽縣練湖上觀音寺中本一小井舊傳水潔
如玉連州太守張思順以淳熙十三年治檄經田專
往訪索僧燧頰而言此泉變爲昏黑已數十年矣初
疑其給乃親往驗視果如黑汁嗟愴不足因題壁曰
觀音寺裏泉經品今日惟存玉乳名定是年來無陸
子甘香收入柳枝瓶明年攝邑六月出迎客後至寺

再汲泉又變白置器中若雲行水影中雖不極清而
味絕勝詰其故蓋紹興初宗室攢祖母柩于井左泉
遂壞改遷不數日泉如故則水之黑白又變幻不常
如此耳 北轅錄云盧溝河卽盧龍也燕人呼水爲
龍呼黑爲盧亦謂黑水河色黑而濁其急如箭 松
漢記聞女真卽古肅慎國其屬分六部有黑水部卽
今之女真其水掬之則色微黑莽丹月爲混同江
一統志真定府定州界有黑水池深而不流俗謂黑
水曰盧云流曰奴漢置盧奴縣 又云平陽府黑山

在浮山縣北亦名牛首又名烏嶺其山卽出黑水亦名澇水西北流入于海大同府有黑河在府城西北又漢中府城固縣西北有黑水諸葛亮箋云朝發南鄭夜宿黑水又固原州北一百五十里有大黑水流入黃河旁有小黑水入焉黑水源出肅州張掖縣鷄山又有黑河在鎮彝千戶所城西四里卽古張掖河流經石峽口入居延海又黑水河在慶陽城西一百三十里源出大白山合浦川流入寧州界玄泉在會川衛城東泉色稍黑灌溉山田民獲其利常

以仲春祀之 臨洮有黑水河 寧夏衛有黑水河

四川叙州府城東南有黑水輿地志謂此水卽禹貢之黑水也禹導黑水至于三危入于南海今此水則自西陲樊界流于南廣洞入于江名同地異也

周南林纂要云玄醴騰湧於陰溝

水之白者江陰張誼宦遊紀聞云弘治辛酉仲夏二日夜分古渝城上忽白光映天見者驚異爭起視之但見渝水明耀浮光上燭而已次早驗之宛如豆汁

人言此水三日始涸歷清叙州府使人檄流至木川

長官司抵崇山峻嶺林木蒼鬱阻不能前詢之父老
言此水發源自建昌從來未有此變 釋氏通鑑云
晉武帝太始八年河州唐述谷至是立寺東谷中有
一天寺常聞鐘聲人入其山每逢仙聖恍惚現寺東
北嶺上出一體泉甜而且白服者不老 一統志順
天府玉泉山東北有玉泉出石罅間因鑿石爲螭頭
泉從螭口噴出鳴若雜珮色若素練味極甘美匯而
爲池廣三丈許池東跨小石橋水經橋下東流入西
湖爲京師八景之一名曰玉泉垂虹 又徽州府城

南有白水泉水色如練 又玉泉在濟南新泰縣北
一十五里水色如玉故名 又陝西文縣有白水在
城外源自松州赤磨嶺流下東北流至縣境宋閻蒼
舒詩廣溪無際燭鬚眉過者竟驚不敢窺爲語世人
須具眼誰知此地有天池 紹興府廣化寺側有白
乳泉其水白如漿須澄之至清有白沙如漿粉棄去
取泉烹之其味甘冽僧具德住其旁多年朝夕飲此
水體本瘦弱後變成肥大之軀面焉 一統志肅州
南城西南二十里有白水下流與紅水黑水合 江

西新淦縣玉笥山白乳泉舊傳梅真人修煉于此有
泉出石竇潔白如乳 又玉泉在龍泉縣東南亂山
中有泉出石罅潔白如玉 新昌縣西乳泉其水五
色光瑩白者如乳 瑞應圖白泉泉色白自出山澤
人君得禮制則澤谷之白泉出飲之使人長壽 易
乾鑿度帝王將起河水先清清變白白變赤赤變黑
黑變黃各三日

湖廣靖州紫井在永興縣北其泉紫色重于他水銅
壺漏取此水以定時刻 唐德宗貞元四年自陝至

河陰河水黑流入汴至汴州城下一宿而復

相馬

相馬之法載于馬經其骨骼毛色而目身蹄稟受不同良駑亦異此自有專門能辨之矣而九方臯之于馬得之于牝牡驪黃之外古人有云相馬失之瘦僧支公亦云吾賞其神駿然則相馬固自有別法耶水東日記云邊塞試馬凡駒生百餘日後以驟馬置山巔羣駒見母奔躍而上一氣及山巔者上也息而後能至者次之再息而後至者則又次矣 國事類記云太僕寺丞十二員分管北直隸山東河南地方每

歲其納馬二萬疋馬毛秘密而齒少者是老馬所產
馬眼光照人見全身者其齒最少照半身者滿十歲
所照漸短其齒愈大識馬有病與無病取其毛附手
掌中相粘者爲無病少粘者則有病 文獻通考云
漢武帝時善相馬者東門京鑄作銅馬法獻之有詔
立馬于魯班門外則更名魯班門曰金馬門臣謹依
儀氏輜中帛氏口齒謝氏唇髦丁氏身中備此數家
骨相以爲法馬高三尺五寸圍四尺五寸有詔置于
宣德殿下以爲名馬式馬馬授傳銅馬相法曰水火

欲分明水火在鼻孔兩間也上唇欲急而方口也欲紅而有光此馬千里頷下欲深下唇欲緩牙欲前向去齒一寸則四百里牙劍鋒則千里目欲滿而澤腹欲充肱欲小季肋欲長垂薄欲厚而緩垂薄股也腹下欲平滿汗溝欲深長而肱本欲起肘腋欲開肱欲方脇欲厚三寸堅如石古之龍馬旋毛合天地之數五十有五白圈皆陽左旋圈微黑皆陰右旋土而尚下下而向上左而右右而左上下左右黑白順逆一一分明所以成變化此古之龍馬爲靈物也他馬

則不然他馬亦有旋毛如上下左右向之順者爲善其反背橫差皆惡也 旋毛在上在左者爲陽向下向右者陽數順也在下在右者屬陰向上向左者陰逆也逆者陰順之謂非違逆也 凡旋毛自上向下下向上左向右右向左者爲善旋上不向上下不向上左不向右右不向左又或左右縱而向上向下上下橫而向左向右參差不一爲惡旋惡旋粗逆易見善旋若滅若沒若亡若失也 凡馬初生無毛者良骨角雙生者良體無旋毛遠看大近看小者良旋毛

細膩溫鮮者良 邊外畜馬之法凡馬至秋高則甚
肥于此而急馳驟不三舍而馬斃矣以其膳未實也
必擇其尤良者加以控馬之方每日步馬二三十里
俟其微汗則繫其前足不令之跳踴躑躅促其銜轡
不令之飲水飲草每日午後控之至晚或曉控之至
黎明始散之牧場中至次日又復如是控之至三五
日或八九日則馬之脂膏皆凝聚于脊其腹小而堅
其脰大而實向之青草虛靡至此皆堅實凝聚即盡
力奔走而氣不喘卽經隔七八日不足水草而力不

竭若邊內人不知控馬之方往往養肥馬以涉遠道
則馬之死者十而九矣故馬不在肥在肥而實相馬
以肥則騏驎不御有以也 珍蓀集云相馬經目成
人者行千里註觀童子中人頭足皆見 書蕉云相
馬經言馬生下墮地無毛行千里尿舉一脚行五百
蘭筋堅者千里馬膝如團趨千里馬一歲上下齒二
十四歲齒黃三十二歲齒落不復出 齊民要術云
相馬不藏法肝欲得小耳小則肝小肝小識人意肺
欲得大鼻大則肺大肺大則能奔心欲得大目大則

心人心大則猛利不驚目四滿則朝暮健腎欲得小
腸欲得厚且長腸厚則腹下廣方而平脾欲得小
腹小則脾小脾小則易養望之大就之小筋馬也望
之小就之大肉馬也皆可乘致瘦欲得見其肉

謂前肩守

肉

致肥欲得見其骨

骨謂頭顱

從後數其脇肋得十者

良凡助十一者二百里十二者千里過十三者天馬

萬乃有一耳

一云十三肋五百里十五肋千里也

蒙造備錄云塞外

地豐水草宜羊馬其馬初生一二年即于草地苦騎

而教之却養三年而後再乘騎故教其初是以不蹄

嚙也千馬爲羣寂無嘶鳴下馬不用控繫亦不走逸
性甚良善日間未嘗芻秣惟至夜方始牧放之隨其
草之青枯野牧之至曉搭鞍乘騎並未始與豆粟之
類凡出師人有數馬日輪一騎乘之故馬不因繁

纂要云相馬法馬頭爲王欲得方目爲丞相欲得明
脊爲將軍欲得強腹爲城郭欲得張四下爲令欲得
長眼欲得高匡鼻孔欲得大鼻頭有王火字口中欲
得赤色膝骨欲得圓而長耳欲從相近而前豎小而
厚先除 羸五駑乃相其餘大頭小頸一羸弱脊大

腹二羸小頭大蹄三羸五駑者大頭緩耳一駑長頸
不折二駑上短下長三駑大脰短脅四駑淺髀薄脰
爲五駑 呂覽古之善相馬者寒風是相口齒麻朝
相頰子女厲相目衛忌相日衛忌相髭許鄙相尻授
伏弱相胃脅管青相臄肋陳悲相股脚秦牙相前贊
君相後凡此十人者皆天下之良工也其所以相馬
者不同見馬之一徵也而知節之高卑足之滑易材
之堅脆能之長短 集異記寧王方宴賓客鬻馬牙
麴神奴請呈二馬寧王卽于中堂閱試座客觀之不

相上下寧王問神奴曰其價幾何牙人先指曰此一
千緡次指曰此五百緡寧王欣然如言付錢賓客莫
測其價之懸殊卽令鞭轡馳驅往復數回笑謂座客
曰辨其優劣否皆曰不知寧王乃顧千緡者曰此馬
緩急百回蹄下不起纖塵復顧五百緡者曰此馬往
來十過足下頗生塵埃以此等第其價之高下焉

龍降之應

輟耕錄云至正乙未秋七月三日橋李城東馬橋上
白龍挂青風怪雨天黑暗若溪夜然壤民居五百餘
所大木盡拔木自半空墜下悉折爲二萬瓦亂飛溪
水直立龍由馬橋歷城北北麗橋壑太湖而去不一
年爲戰鬪之地凡龍所過處荆棘寒烟衰草野燐視
昔之繁華如一夢也 朝野紀畧云正德年中夏有
龍墮于陝西乾州長數十丈目光如火開闔閃閃可
畏四足據地而行五里許得井水飛去旣而其村多

疫死殆不祥也 文獻通考云梁天監二年北梁州

渾中有龍鬬噴霧數里京房易飛候曰衆心不安厥

妖龍鬬是時帝初卽位而有陳伯之劉季連之亂國

內危懼普通五年六月龍鬬于曲阿王陂因西行至

建陵城所經之處樹木折開數十丈至太清元年黎

州水中又有龍鬬波浪涌起雲霧四合而見白龍南

走黑龍隨之其年侯景以兵來降帝納之而無備俄

而難作帝以憂崩 程史云金國僖宗宣皇統十年

夏龍見御察宮中雷雨大至破柱而去宣大懼以爲

不祥欲厭禳之左右以爲常肆赦召當制學士張鈞
視草其中有顧茲寡昧及渺予小子之言譯者不曉
其退託謙冲之義以爲漢兒詈我主上釋之曰寡者
孤獨無親昧者不曉人事眇爲瞎子小子爲小孩兒
曹大怒亟召鈞至詰其說未及對以手劍斫其口棘
而醢之其年曹被弑亮初登位赦文暴其惡引及此
事 梁元帝承聖二年三月有二龍自南郡城西升
天百姓聚觀五采分明江陵故老竊相泣曰昔年龍
出建康淮山天下大亂今復有焉禍至無日矣帝聞

而惡之踰年而遭禍

龍吟之應

名勝志云唐薛令之居靈谷草堂在福安縣山中嘗
聞龍吟之聲後登神龍二年進上開元中累補左補
缺太子侍講卽題朝日上國圖之詩者也 靈怪集
云太尉房琯嘗修學終南山谷中間忽聞聲苦夏銅
器之聲蓋未之前聞也問父老云此龍吟也不久雨
至矣琯望之冉冉雲氣瀰漫果驟雨自爾再聞徵驗
不差後將金鉢憂之爲僞龍吟云 寰宇記云天統
三年行臺右丞盧濟屯兵于皖于時龍鳴城內潛以

不祥移軍在外乃號龍鳴城 僧契嵩鐔津集云吾
年十九時往吾邑之寧風鄉至姚道姑舍姑異人也
留數日遂聞其舍之山脅有聲發于陂池之間春然
若振大鐘者數吾初怪此非有鐘可聲以問道姑姑
曰異乎此龍吟也聞此者大瑞子後必好道姑處子
時嘗取水溪中身感龍漿及人禮之夕龍光發于房
女子卽亡之而還不樂家居鄉人神之遂結精廬于
山中自少精潔齋戒頗逆道人間吉凶多驗今年六
十不復道吉凶事處高樓專誦妙法蓮花經數萬言

日夜必數峽吾嘗問其所以授經曰姬少時嘗有神
僧乘虛而來教姬耳故知其所謂龍吟者不妄也

謝東山云難足山有大龍潭每潭中龍吟必有老僧
入城者 蚩尤帥魑魅與黃帝戰于涿鹿之野帝命

吹角爲龍吟御之

吹角似龍吟又
云似瓦銅器聲

廣東名勝志云

化州之州庭左有石微露出地謂之龍首州治後有

石潛江中謂之龍尾每夜靜龍首多鳴吼聲類鷺而

洪大特甚隋開皇間置石龍縣者以此今者入州至

弘治間石龍鳴三日夜州同知楊景生子一清弘治

間爲太平樂

降生之瑞

朝野紀畧商輅父名仲宣爲嚴州府吏輅生時太守
夜間遙見吏舍有光踪跡之非火也翼旦問羣吏家
夜間有何事羣吏云商仲宣生一子太守曰此子必
貴非尋常人宜善撫之是日適有以宋馮文簡京中
三元記餽之後輅竟中三元入相云 王鳳洲作嚴
相傳云嚴嵩父爲藩司吏其婦方娠而有光起解舍
已生嵩藩司奇之齋醪繡錢布以贈之後卒爲權相
二人者其生時之有光同其入相同而一賢一奸薰

猶迥別豈造物止標其入相之瑞而不究其終局耶

又鄒康靖公幹乃少詹事鄒濟之子也餘杭人幹

在姪時濟爲春坊庶子英廟一夕有夢召曰者占

之奏曰此大臣生貴子兆也上問廷臣濟對曰臣

婦夜生一子上喜特旨每月給米一石幹後歷官

禮部尚書彼二人爲宰相初生時見其兆于濟司郡

伯鄒幹終于尚書何至初生時見其兆于帝王耶

閩書泉州府治舊時皆在雲山之麓宋韓國華爲守

忠獻魏公寔生于此公生時治前榕樹悉花花如拳

枝今樹尚在 春渚記聞云楊文公之生也其胞蔭
始脫則見兩鶴翅交掩塊物而蠕動其母亟令密集
諸溪流始出戶而祖母迎見亟啓視之則兩翅欲開
中有玉嬰轉仄而啼舉家驚異以爲非常器也 陳

眉公見聞錄云太原王相公

諱錫爵

始生冷無氣母驚

謂已死有隣姬徐氏者反覆諦視良久笑曰此俗名
臥胞生者吾能治之當活後必富貴但不免多病累
阿奴耳趣治之其法用左手掬兒右手摳其背百餘
下逾時噤下而醒

秘笈云李筌爲鄧州刺史常占星宿而坐一夕三更東南隅忽見異氣明且呼吏于郊如產男女悉取至筌視十餘輩曰皆凡骨也重令于村落搜訪之得牧羊胡婦一子李慘然曰此假天子也座客勸殺之筌不可曰胡雛必爲國盜若殺恐生真者胡雛卽安祿山也蜀檮杌蜀主孟知祥生時有火光照室鄰里皆異之有僧見而撫之曰此五臺山靈也南唐書馬仁裕徐州人唐北平王燧裔孫世爲武寧軍校仁裕母方娠夢傳呼北平王來歸生時紫氣滿室大

中記胡寅夫人翁氏密州司戶揆之女也生之前一
夕其祖殿撰夢有通謁者曰吾夢女星也當生君家
翼日而翁氏生紅光滿室殿撰曰此必清貴而壽者
也長歸于寅以婦德聞見玄孫者三封太原寧郡太
夫人 後漢書應樞生四子神光照社或曰天符也
尹喜母夢絳霄流繞其身遂生喜雙光若飛流滿
堂良久乃散 十國春秋唐乾寧三年丙辰狀元沈
亞之字子甫閩人崧初生時有大蛇踞榻前引首注視
久而方去既七日將浴忽風雨雷震壞浴盤人咸異

之乾寧二年刑部尚書崔凝知貢舉登進士第者二十
五人崧與焉已而昭宗御武德殿命翰林學士陸
衮秘書監馮渥覆試凡落十人崧再入選後崧與羅
隱從事浙江幕下王公出效衆稱殊麗便似嫦娥崧
曰嫦娥甚陋如何及此王公驚曰書記識嫦娥否曰
崧常兩度到月宮何爲不識崧蓋以是諷隱云

梁顥詩

他書有考而未詳

何文肅喬新題梁顥墓云顥年四十餘登第官至秘書卒年五十子固亦登第爲執政名載宋史而好事者相傳謂八十二舉狀元至其子孫亦無知者詩以訂之詩曰四十登科五十二史官還載秘書梁誰將鶴髮欺公道遂使龍頭失故常世俗故應多信耳子孫何得誤傳芳有靈地下還知此獨對泉離笑幾場予按宋末亨搜採異聞錄云陳正敏遜齋閑覽梁顥八十二歲雍熙二年狀元及第其謝啓云皓首窮經

少伏生之八歲青雲得路多太公之二年後終秘書
監卒年九十餘此語旣著士大夫率以爲口實予以
國史考之梁公字太素雍熙二年廷試甲科景德元
年以翰林學士知開封府暴疾卒年四十二子固亦
進士甲科至直史館卒年三十二史臣謂梁方當委
遇中塗夭折又云梁之秀中道而摧明白如此遽齋
之妄不待攻也又按朝野雜記考少年狀元則梁內
翰顯張舍人孝祥王尚書佐皆年二十三雍熙二年
乙酉至景德元年甲辰却年二十則四十二而卒與

異聞錄符合其所謂國史乃宋時之史也若元時所
定之宋史則云景德元年權知開封府暴卒年九十
二則又據其八十二歲中甲科之說而推衍之也然
雍熙乙酉至景德甲辰已閱二十年若八十二歲登
第至卒時又該年一百零二歲矣不若二十三歲中
甲科四十二歲而卒之爲確何文肅亦深于考古者
四十登科五十二又從何証據乎 按顓子梁固幼
有志節常著漢春秋顓器重之以蔭賜進士出身大
中祥符元年讓前命舉服勤詞學科以祥符二年已

酉擢甲第解褐將作監丞幼子梁適字賢仲少孤常
輯父遺文及所自著以進真宗曰梁顥有子矣授祕
書省正字更舉進士官至樞密副使進同平章事

宋呂希哲傳講雜記云翰林梁狀元顥卯角時從其
父至官府畢士安時爲郡官見其有異子人定日看
壁上書字問其父曰此子讀書耶曰亦就學曾學屬
對否曰其師常教之但不識其能否指壁間曰此一
句詩無人得對曰鸚鵡能言爭似鳳顥應聲曰蜘蛛
雖巧不如蠶畢驚異延之家塾教養之卒成大名

東坡考亭之號各有原本

附 涪翁

名勝志云白樂天爲蜀忠州刺史于東坡種花東澗
種柳勝覽云東坡在南賓郡圃有亭名東亭樂天詩
綠樹爲朋友紅蕉當美人又何處慙慙重回首東坡
桃李種新成又最憶東坡紅爛熳野桃山杏水林檎
蘓子瞻東坡之號實始于此其序云平生自覺出處
老大粗似樂天非東坡之名偶爾同也 二老堂詩
話云白樂天爲忠州刺史有東坡種花二詩又有步
東坡詩云朝上東坡步夕上東坡步東坡何所愛愛

此新成樹蔭文忠公不輕許可獨敬愛樂天屢形詩
篇蓋其文章皆主辭達而忠厚好施剛直盡言與人
有情于物無着大畧相似謫居黃州始號東坡其原
必起于樂天忠州之作 閩書云建陽王枕山考亭
在其麓謂之考亭者唐黃端公堦父于此名其亭曰望
考亭以望先壠也端公之父爲故唐禮部尚書宋朱
韋齊遊此愛其溪山清達可以卜居紹熙壬子文公
成先志自崇安潭溪徙築時年六十一矣越年學徒
益盛廣而居之名精舍曰竹林後更改曰滄洲前作

孔子燕居廟扁堂中和中奉孔聖配以顏曾思孟
壁畫周濂溪程明道伊川邵康節張橫渠司馬涑水
六先生像後增李延平爲七賢文公與門徒晨夕禮
拜而自居其右周垣之旁若廟祝然其尊奉禮
謂至矣中和堂聯曰道迷先聖紇學誤遠方來則其
自任之重若有不得而辭者 按黃端公名子稜字
元威洛陽人隨父入閩累官侍御史居建陽之東觀
山有詩云青衫木笏尚初官未老金魚是等閒世上
幾多名將相門前誰有此溪山 愛日齋叢抄云山

谷謫涪州別駕因自號涪翁按益州耆舊傳廣陵有
老翁釣于涪水自號涪翁後漢逸民傳初有父老不
知何出常漁釣于涪水因號涪翁唐書陸龜蒙傳時
謂江湖散人或號天隨子甫里先生自北涪翁注云
巴西人居漢上者獨不用前二書爲證然則涪翁之
稱蓋連山谷而五矣

聲氣

沈作誥寓簡云凡人一身視聽語言飲食口耳目未嘗少休也惟鼻止與司出入息勞役頗省然其寐寢則耳目之用皆暫止而鼻之出入獨無異丁晝同話錄云聲者氣之精粹也一紙之隔而氣不能達牆垣之間聲可得聞聲之感通者甚神故詩能動天地感鬼神樂能洽神人和上下皆主其有聲也 關書宋福清林萬頃字叔度始解春秋易陳藻不善也及見其解同聲相應章曰當北面矣萬頃解曰蠶絲吐而其

商絃絕銅山崩而洛鐘應其聲同也磁石引鍼琥珀
拾芥其氣同也氣同聲異天壤咫尺聲同氣異咫尺
天壤平地而水濕者先濡水上而下也抱薪而火燥
者先燃火下而上也龍興而雲從雲白下而上應者
也虎嘯而風號風自上而下應者也水火燥濕無情
而應有情雲龍風虎有情而應無情者也 蠡海集
云凡掘地作坎出其土既成坎以其土實之則耗半
矣其故何也蓋萬物藉氣以爲質一動則氣泄氣泄
則質爲之損也 席上腐談云素問言升降出入無

器不有註云壁窓戶牖兩面伺之皆乘來氣衝擊于人是則出入氣也以物投井及葉下翩翩不疾皆升氣所礙也虛管漑滿捻上懸之水固不泄爲無升氣而不能降也空甌小口頃漑不入爲氣不出而不能入也故曰升降出入器無不有予幼時有道人見教則劇燒片紙納空甌急覆于銀盆水中水皆湧入甌而銀盆鏗然有聲蓋火氣使之然也又依法放于壯夫腹上挈之不墜卽如銅水滴捻其竅則水不滴放之則滴修養家存神于泥丸則丹田之氣上升蓋神

之所至氣亦隨之而住也房中術所謂手按尾間吸氣嚥津雖得其緒餘而亦不泄 仇池筆記云晉方技傳有韋虛者有道術呂猗母足得痿痺病十餘年虛療之去數步坐牕目寂然有頃曰扶起夫人坐猗曰夫人得疾十年豈可倉卒令起耶虛曰且試扶起兩人夾扶而立少頃去夾者遂能行學道養氣者至足之餘能以氣與人都下道士李若之能之謂之布氣吾中子迨少羸多疾若之相對坐爲布氣迨聞腹中如初日所照溫溫也蓋若之曾遇得道異人于華

岳山下云 獨異志云王鏐爲辛京杲下偏禪杲時
帥長沙甚易之一日擊毬馳逐旣酣鏐仰天呵氣高
數丈若白練上衝杲謂妻曰此極貴相遂以女弟配
之鏐終爲將相 雲溪友議云李筌郎中爲荆南節
度判官集闔外春秋十卷旣成自鄙之曰常文也乃
註黃帝陰符經兼成大義至禽之制在氣經年懵然
不解忽夢烏衣人引理而教之所謂玄龜食蟒黃腹
服虎飛鼠斷猿狼蝨嚙鶴以小服大皆以氣制之也
此烏衣之旨而筌通其意其書遂行于世僉謂鬼谷

留侯復生也。經粗堂云松聲澗聲山禽聲夜蟲聲
鶴聲琴聲棋落子聲雨滴堦聲雪洒窓聲煎茶聲作
茶聲皆聲之至清者而讀書伊吾聲爲最。王氏彙
苑漢武帝駕出駙馬都尉巫炎見於渭橋上見炎頭
上有鬱鬱紫氣高丈餘帝召東方朔使相此君有何
道術朔曰此君有陰陽之術。

秦將

秦時火燔詩書禁令甚嚴至漢初其禁未弛故一時忠義豪傑之士多有湮沒不傳者于以見焚書之罪大也予于己卯年以赴試應天行至鎮江辛豐停船入辛君廟廟有宋人碑記云辛君諱翼字大鵬韓人秦時結客欲爲韓報仇而不果後追叛賊至此遇紫虛真人遂修道漢時以壽終至隋開河而其塚中顯靈故祠于此祀之至今名勝志云山東膠州栢蘭將軍廟史逸其姓名秦將也韓信下齊追田橫假道

于栢蘭栢蘭不忍倍齊與信拒力戰而死 輟耕錄
至正丙申歲大旱蕭山有方士陳希微禱雨于武祐
廟累日俄降筆云吾秦人厲狄也與項羽起山陰雖
功不竟而死然有德于民其父老不忘我者俾血食
于此爾歷千五百年世代雲變遂湮我姓名至蔑焉
無聞故以相告耳至今人呼爲厲將軍廟又謂之北
嶺將軍正名爲武祐廟也劉誠意伯基記云北嶺將
軍爲神甚靈能祛疫厲作雲雨有所必應宋徽宗時
方臘反睦州自睦入杭其舟將渡江吏民大恐怖相

率禱于神比寇至卽有風逆其舟且見甲士列岸上
甚衆乃止不敢渡寇平知越州劉幹上其績于朝賜
額曰武祐廟後封顯應侯元至正十二年江浙行省
烽火通于蕭山百姓驚竄市井爲空主簿趙君誠至
縣甫八日卽往西興募民禦寇而沿江守兵單弱無
賴子競起剽劫應寇衆恟懼君卜于神神許之吉衆
心稍安乃分遣捕誅無賴之剽劫者有自賊中來言
賊欲遣兵攻浙東見江岸列甲卒旗幟如睦寇欲渡
時寇以故畏懼無東心寇退邑人皆德趙君而君歸

功于神明年夏大旱君往禱輒得雨元統甲戌之春
天大雨雹廟毀惟神所居室獨存君乃與邑人維新
其廟焉 小卜靈岳祠在姚州府城西北小卜莊躋
之將也從躋定滇中戰死于此蒙氏立廟祀之 紀
畧云石氏名固秦之將也生于贛沒而爲神今四方
所爲江東廟者吳楊普嘗署爲昭聖王宋封崇惠顯
慶昭烈忠佑王賜廟額曰嘉濟元易爲護國普仁崇
惠靈應聖烈忠佑王更廟額爲聖濟宋贛縣尉傅堯
嘗爲撰籤詞百章今乃移其籤詞于關神者 洪武

太祖欲伐江東廟前一樹爲桅竿卜于江東神得籤
云世間萬物皆有主一粒一毫君莫取英雄豪傑本
天生也須步步循規矩太祖怒以其籤筒置于關
神之前曰此籤詞當助靈關眞君耳故本朝卜于關
神以此詞決焉按江東神漢高六年潁陰侯灌嬰討
南粵神報以克捷之期唐大中元年里人行禱有奇
徵宋元祐間夏旱洎火災先後皆應禱有降雨滅火
之驗隆祐孟太后駐蹕于額金人深入至皂口彷彿
覩神兵甚衆乃旋免都統制李畊殲叛兵山寇皆其

陰翊之力今處處祠祀之宋景濂有碑記 淮南子
始皇利粵之犀角象齒翡翠珠璣乃使尉屠睢發卒
五十萬爲五軍一軍塞鐔城之嶺一軍守九疑之塞
一軍處番禺之郡一軍守南野之界一軍結餘干之
水興安縣有靈渠亦名秦鑿渠始皇命屠睢伐越史
祿轉餉乃自零陵上流鑿渠至桂林渠內置斗門三
十六所每斗門闢之以俟水積漸進故能循崖而上
建甌而下既通舟楫又利灌溉號爲靈渠 梅銷墓
在餘干縣之梅港鄱陽吳芮秦時爲鄱陽銅其碑在

也後隨芮入漢爲長沙王 瑯環記引賈子說林云
張璘者秦人也字子石年二十與其弟耕性好讀書
耕畢輒握典籍呬唔堽上人皆笑曰凡讀書者皆求
所以榮親戚顯名聲也今終日孜孜而不離畝畝則
讀書何益乎人謂張孺子多才吾不信矣璘聞之曰
是何難哉于是裹糧負書求見秦王說之以彊秦弱
諸侯之策旨甚溪妙秦王說之拜爲上卿璘曰臣少
貧賤恒爲鄉里所戮笑幸遇陛下官爲上卿實非所
冀有如籍陛下神靈使得錦衣還鄉足矣秦王留之

再三固辭于是賜以黃金珠玉錦繡發車馬人徒送之歸里人以爲榮無不匍伏而前不敢仰視璫故自尊貴而痛抑之居數日盡召宗族鄉黨與歡飲盡出所賜黃金珠玉錦繡散之家無所留躬操耒耜與妻子戮力終不出矣陳勝吳廣起變姓名入山中及沛公定天下人有遇之容色鮮好採藥行歌此亦秦人與蘓秦頗相似至其散財與宗黨則未聞蘓秦曾有此舉也乃說王而非將然可傳而史失焉故併誌之

歷代田名各異

弄田名田分田民田
華田代田爰田王田

漢書昭帝紀上耕于鉤盾弄田注弄田在未央宮中
謂遊晏之田天子所戲弄也鉤盾宦者近署昭帝幼
卽位故往試耕爲戲弄 哀帝紀諸侯王得名田國
中列侯公主得名田縣道吏民名田無得過三十頃
賈人皆不得名田爲吏注名田私置田也 食貨志

豪民侵陵分田劫假注分田謂貧人無田而耕種富
人田分其所收也假亦謂貧人賃富人田也劫謂劫
奪其稅也 羣談錄餘云按文獻通考言唐始使民

得立券自買其田遂有私田此說亦未深考如蕭何
買民田自污貢禹被召之日賣田百畝以供車馬自
漢以來有矣倘湖樵人曰不必始于漢也春秋時顏
子所謂負郭之田戰國時蘓季子所謂使我有洛陽
之田二頃王剪發兵廣求田宅豈非所謂私田而民
田哉 升庵詩話云夏侯湛獵兔賦息徒蘭圃秣驥
華田日送歸鴻手揮五絃優哉優哉聊以永年華音
花言華茂之田也亦是奇語 漢書武帝末年悔征
伐之事乃封丞相爲富民侯下詔曰方今之務在于

力農以趙過爲搜粟都尉過能爲代田一畊三畝歲
代處故曰代田師古云代易也是時邊城河東弘農
三輔太常民皆便代田用力少而得穀多 漢書秦
孝公用商鞅制轅田註云轅爰同周制三年一易以
同美惡商鞅始割裂田地開立阡陌令民各有常制
爰自在其田不復易居也 王莽更名天下田曰王
田奴婢曰私屬皆不得賣買其男口不盈八而田過
一井者分餘田予九族隣里鄉黨先是哀帝年間師
丹建言請行限田之法丞相孔光大司空何武奏請

諸侯王列侯皆得名田國中列侯在長安公主名田
縣道及關內侯吏民名田皆無過三十頃犯者沒入
官其制雖定亦寢不行至新莽時有王田之舉行三
年而罷後魏孝文太和九年間因李安世之請行
均田之制諸男夫十五以上受露田四十畝不成事者謂之
露田諸桑田不在還受之限夾漈鄭氏曰觀其所受者
露田而諸桑田不在還受之限意桑田必是人戶世
業是以栽植桑榆其上而露田不栽樹則似所種者
皆荒閑無主之田又諸遠流配謫無子孫及戶絕者

虛宅桑榆盡爲公田以供授受固非盡奪富者之田以予貧人也。宋皇祐治平間歐陽修言秘書丞孫林嘗往洛州肥鄉縣與大理寺丞郭諮以千步方田法括定民田請于亳壽蔡汝四州擇尤不均者均之。神宗熙寧五年重修定方田法以東西南北各千步當四十一頃六十六畝一百六十步爲一方方量畢以地及色參定肥瘠而分五等以定稅凡田方之角立土爲埧植其野之所宜木以封表之有方帳有莊帳有甲帖有戶帖其分烟柝生典賣割移官給契縣

置簿皆今所方之田爲正元豐八年帝知官吏奉行
多致搔擾詔罷方田崇寧三年蔡京請復行方田從
之按周禮于田有各別之名載師則掌任土之法
以物地事授地職而待其政令以廛里任國中之地
以場圃任園地以宅田士田賈田任近郊之地以官
田牛田賞田牧田任遠郊之地以公邑之田任甸地
以家邑之田任稍地以小都之田任縣地以大都之
田任疆地註云宅田致仕之家所受田士田圭田也
賈田在市賈人其家所受田也官田庶人在官者其

家所受田也牛田牧田畜牧者之家所受之田也賞
田賞賜之田公邑謂六遂餘地天子使大夫治之家
邑大夫之采地小都鄉之采地大都王子弟所食邑
也置五百里王畿界也 碧里雜存云畝法古今不

同漢書鹽鐵議曰古以百步爲畝漢高帝以三百四
十步爲畝今時俗謂云橫十五豎十六一畝田穩穩
足蓋以十五乘十六正是二百四十若古之百步以
今弓准之則其一畝當今四分強耳故后稷爲田一
畝三畝廣尺深尺是橫過一弓直長一百弓也古之

一夫授田百畝當今四十一畝耳播種之區一畝三畝通計百畝三十丈闊六十丈長耳傳言顏子有田百畝信乎其貧哉

五經應試

天啓丁卯鄉闈閩人顏光衷茂猷兼舉五經成文二十二首外簾得之以其文堪入彀惜爾違式命止錄易經義以進吾鄉祁世培彪佳取中迨聖卷入對始知其兼五經也甲戌會試亦兼五經大座主不敢自專題疏上請命特中進士故會錄列其名于會元之前及壬午之北闈癸未之會闈嘉興譚策嚴貞默慈谿馮眉仙元應皆以兼五經具題 奉旨一體校閱各與中式焉予考之闕書漳州長泰縣黃文史字廷

實晚號遯叟穎悟博通洪武二十二年應貢庚午試
南畿五經題兼作以違式取旨太祖讀其天下
一家論大見稱異御批特與第一免會試受刑部主
事此則兼五經而應試之始也宋時鄭俠之父暈同
五經出身大觀二年莆田黃泳以童子特賜五經及
第又孫奭中九經狀元真宗朝蔡齊字子思亦中九
經狀元

儒家測數

閩書蔡季通爲堂于象巖山曰顯慶讀書其中紹興
辛巳季通于堂中推演子孫世數末有數數輪奐猶
有代御史尹仁爲吹噓成化丙申巡按御史尹仁入
關夜夢一老人來見叩姓名蔡某也至建陽訪蔡家
譜見顯慶堂推演詩不覺悚然卽捐俸爲建傳心堂
菽園雜記云朱晦菴先生墳墓乃先生自觀溪山向
背而爲之面值一江有沙巨其間先生嘗云此沙開
時吾子孫當有入朝者其家有私記存焉景泰間朝

廷念其有功于世求訪其子孫于是九世孫庭徵入

朝授五經博士世官一人主祀公文未至之數日其

沙忽被水衝開適中其言

此墓在建陽

湯幃小品云劉

太保秉忠祖康懿公弟秉如墓俱在那臺縣治西南

去賢村嘉靖年間為盜所發內有石刻云為盜者李

維寧聞于府捕得治罪劉兄弟精數學故前知如此

樊堅志云昭州

今平樂府

郡岡有亭名天繪建炎中郡

守李不以與金國年號同欲更之乞名于徐師川久

而未得有范某為易曰清渾已揭榜而師川來謁李

視積壤有片石斑斑如有文字取而滌之乃此亭舊
記其畧云予擇勝得此亭名以天繪取其景物自然
也後某年月日當有俗子易名清輝者可爲一笑考
其命名之日與此不差元中陸文圭字子方江陰
人宋咸淳初文圭年十八以春秋中鄉選宋亡元延
祐設科有司強之就試凡一試中鄉舉文圭爲文東
南學者皆師宗之朝廷數遣使馳幣聘之以老疾不
果得卒年八十五一日語門人曰吾州二十年後必
有兵變吾死當葬不食之地勿封樹使人不知吾墓

庶無暴骨之患其於江陰之亂家墓盡發

診夫知妻葬子蔭父

古人言夫壽觀于其妻父祿卜于其子此言骨肉一
氣婦不當嫡則夫應延算子不當貧則父猶受祿理
之可通若夫診脉則相其一身之血氣盈耗耳夫之
脉何預于妻名賢錄云紹興間邢氏以醫名于杭術
業甚奇時韓侂冑知閣門將出使俾之診脉曰和平
無可言所可憂者夫人耳知閣回輅日恐未必可相
見也韓妻本無疾怪其誕妄不倫然私憂之洎出疆
甫數月而報卒又宋棣字彥誠鄞人靖康初逃難于

高巖得石匣有書一劍一印自是知役鬼治病之術
最異者能追覓診脉人有病者妻則診其夫父則診
其子有祟則以法治之無祟吞符亦安是則診夫而
知其妻世蓋有其術矣夫木華于山栗芽于室銅山
西崩洛鐘東應言一氣之相通也故祖父遺鬼藏于
名山大川銷風納水而子孫受其福報古來聖賢不
廢其說也若夫葬子則何能反蔭其父哉戎幕閒談
唐有僧泓師善陰陽術數與韋安石善嘗語安石曰
貧道近于鳳棲原見一地可二十餘畝有龍起伏形

勢葬此地者必累世爲台座安石曰老夫有別業在城南待閒時陪師往視地所問其價幾何安石妻聞謂曰公爲天子大臣泓師通陰陽術數奈何一日潛游郊野又買墓地恐禍生不測矣安石懼遂止泓嘆曰國夫人識達先見非貧道所及若要買地不必躬親夫人曰欲得了義兼地不要買安石曰舍弟紹有中殤男未葬便與買此地泓曰如賢弟得此地卽不得將相位止列卿已而紹竟買其地葬中殤男紹後爲太常卿禮儀使卒官是則葬子而蔭其父世蓋又

有其術矣 名賢錄又云明奉化吳國材相術巧中
遠游歸訪縣故舊值不在其孫開肆乃索筆爲書紙
留而去祖歸孫曰頃有吳翁留書祖啓視之曰此吳
國材先生也風鑒入神久遊始回書中云相汝色汝
婦當有粉骨碎身之禍其慎之及期婢婦晏坐新室
竟日不出抵暮食既至期啓檻取水虎爪之入山以
食按國材卽袁廷玉珙之師此乃相夫而知其妻者
矣 清波雜志云治平中京師醫僧智緣爲王荆公
診脉言當有子登科中之喜時王禹玉在坐溪不然

之明年雱果登第緣自矜語訛而公乞文以爲寵公
爲書曰妙應大師智緣診父之脉而知其子有成名
之喜翰林王承旨疑古無此緣曰昔秦醫和診晉侯
之脉知其良臣將死夫良臣之命尚于君之脉息見
之因父知子又何怪乎 南史梁丁貴嬪薨昭明太
子求得善墓地將斬草有賣地者因閹人俞三副求
市若得三百萬許以百萬與之三副密啓武帝言太
子所得地不如今地于帝吉帝末年多忌便命市之
夫葬丁貴嬪而曰于帝吉則又是葬妻而欲蔭及夫

矣 王行甫云寧遠伯王公驥尹順天時病甚且死
急召袁柳庄視之亦謂不可活夫人驚悼出視一見
卽曰無事無事夫人一品相豈虛得耶已果愈以征
麗川功封寧遠伯夫人封一品 朝野僉載唐杭州
刺史裴敞疾甚錢唐主簿夏榮看之曰使君無慮夫
人須崇福以禳夫人問禳法曰娶二姬厭之出三年
厄過夫人怒曰此獠狂語兒無病何禳爲曰夫人不
信榮不敢言使君合有三婦不更娶于夫人不祥夫
人曰乍可死此事不相當其年夫人死更娶二姬

頂日揆月

古人取日虞淵及扶輪之說不過取其意而言之耳
揮戈返日蓋屬誕妄至于嫦娥奔月渺茫無稽并月
宮遨遊梯天取月亦歸妖幻可以付之不論獨庚巳
篇云楊州有趙都統號趙馬兒提兵船往援李璣于
山東舟至登萊殊不可進留滯凡數月常于舟中見
日初出海門時有一人通身皆赤眼色純碧頭頂大
日輪而上日漸高人漸小凡數月所見皆然然則太
陽果有人頂之而出者耶快雪齋漫錄云虞長孺祖

母今年八十一矣常云年三四十時秋夜露坐庭中
見有三人挨月而過異之急呼長孺伯母同觀伯母
出遲僅見其二須臾俱入月中矣然則太陰之在天
果有挨之而過者耶 天中記義和東方二國名日

所由過處每日出二國人爲御推而升太虛然則趙
馬兒所見豈卽此耶 宣室志周生有道術中秋夜
會月色方瑩謂坐客曰我能挈月置之懷袂因取筯
數百條繩而駕之曰我梯此取月俄以手舉月懷中
出月寸許光色照爛寒入肌膚 長慶山人楊隱之

在鄆州常尋訪道者有唐居士土人謂百歲人楊謁之因留楊止宿及夜呼其女曰可將一下弦月子來其女遂貼月于壁上如片紙耳唐卽起視之曰今夕有客可賜光明言訖朗如張燭 宣室志云長慶中有王先生者弘農晦之聞其有術往謁焉王留之宿乃八月十二日也先生召其女七娘謂之曰汝爲我刻紙狀今夕之月置于室東之垣上有頃七娘以紙月施于垣上忽月光洞然一室毫髮盡辨晦之驚嘆不測 西陽雜俎云太和中鄭仁本表弟常與一王

秀才遊嵩山迷歸路徙倚間忽覺叢中鼾睡聲見一
人枕一襪物方眠因就問之其人笑曰汝知月乃七
寶合成乎月勢如丸其影日燦其凸處也常有八萬
二千戶修之予卽一數取玉屑飯兩裹授與二人曰
分食此可一生無病乃指一支徑示之言已不見又
月中有桂有蟾蜍月桂高五百丈下有一人常斫之
樹剝隨合其人姓吳名剛學仙有過謫令伐樹

草木泉石蟲魚之誨滌者

頓遜國有滌樹晝開夜合名曰夜合亦云有情樹花如牡丹而香種有雌雄必二種並種乃生花去根尺餘有男女陰形以別雌雄種必相去不遠晝開夜合若各自種則無花也雌實如李而差大雄實如桃而小男食雌實女食雄實可以愈虛損 李鄴何首烏傳云何首烏順州南河縣人祖名能嗣父名延秀能嗣本名田兒生而闕弱年五十八無妻子嘗慕道術隨師在山一日醉臥山野忽見有藤二株相去三尺

餘苗蔓相交久而方解解了又交田兒驚訝其異至
旦遂採其根歸問諸人無識者有山老曰子旣無嗣
其藤乃異此恐是神仙之藥何不服之遂取其根杵
爲末空心酒服一錢七七日而思人道數月似強健
因此常服又加至二錢經年舊疾皆瘥髮烏容少十
年之內卽生數男乃改名能嗣又與其子延秀服皆
壽百六十歲延秀生首烏首烏亦服藥生數子年百
三十歲此藥名交藤亦名夜合有赤白二種赤者雄
苗色黃白白者雌苗色黃赤 寧康人濠有方士獻

房中術者用一石卵佩衣帶間香氣氤結經月不覺
自是容止無度嬪御苦之潛投石卵在沼中拷問竟
無覓所方士言取海鸛來跡之可得俄一鸛瞥至迴
翎似有覓忽沉沼銜石而去庶人驚悵尋究所以方
士曰此石海鸛精也海鸛恒孤飛雲表俯瞰海流照
見其影以爲已雌驟下追逐頡頏之間不覺精墮凝
化爲石佩者御女惟意所如非術致海鸛不能得耳
漱石閒談云稀差者南中鳥也數十年一至至期
則雌雄繞樹而飛不止數日忽一接遺精在地人掘

而乾之食一毫足助一夕之歡 范石湖虞衡志云
山獼出廣之宜州溪峒及南丹州土人號爲插翹其
性淫毒山中有此物凡牝獸皆避去獼無偶則抱木
而枯獼女春時成羣入山採物獼聞婦人氣必躍來
抱之刺骨而入牢不可脫因扼殺之負歸取其陰二
枚值金一兩若得抱木死者尤奇貴峒獼甚珍重之
私貨出界者罪至死然本地亦不常有方士多以鼠
璞獼胎偽造試之之法但令婦人摩手極熱取置掌
心以氣呵之卽趯然而動蓋汎所感也 拾遺錄云

日南國有滫泉男女飲之則滫其水甘軟 名勝志
云瑞州府新昌縣洞山寺水口有夜合石高丈餘土
人謂二石夜間常合爲一 四川寧番衛外金川堡
係威龍州地有公母石志云兩石相隨人或分之明
日復合土人呼爲公母石猶言翁姥也 菽園雜記
成化間漕河築堤一石中斷中有二人作男女交媾
狀長僅三寸許于是股體皆分明若雕刻而成者莫
究所以以獻平江伯陳公銳珍藏之

名勝志云雲南廣南府小孟貢江產鯢魚食之日御

百女彘性極淫無論貴賤有數妻不妬忌 春渚記
聞蕭注從狄殿前破洞蠻也收寶貨珍異得一龍長
尺餘云是鹽龍蠻人所豢也藉以銀盤中置玉盃以
玉筯撈海鹽飲之每鱗甲中出鹽如雪則收取用一
錢七專主興陽後因蔡元度就其體砥鹽而龍死其
家以鹽封其遺體三數日用亦大有力後聞此龍歸
蔡元長家云

龍虎助軍威

諸葛武侯八陣有龍虎鳥蛇之目蓋按其象而爲東方蒼龍七宿西方白虎七宿令軍士排列變化其中非真有江海之龍山岡之虎可得而驅使之如胡僧咒雨道士行符作百端怪幻者史記黃帝教熊羆貔貅貔虎以與炎帝戰于阪泉之野三戰然後得其志索隱云周禮服不氏掌教養猛獸即古服牛乘馬亦其類也漢書王莽末巨毋霸出師驅虎豹犀象諸猛獸以從昆陽之戰師崩衆潰虎豹爲之股栗此

則真以虎豹爲兵而虎豹亦莫敵兵之敗予考史得
數事焉渚宮故事云陸法和隱于江陵百里洲侯景
渡江南郡朱元英往問之法和曰果熟時不撩自落
檀越但待候景熟無勞問也景遣任約寇江陵法和
出詣湘東自乞征任約召諸蠻弟子八百人在江津
二日候發法和登艦大笑曰無量兵馬江陵多神祠
人俗常所祈禱自法軍出無復一驗人以爲諸神皆
從行故也至赤洲湖與約相對法和乘輕舟不介冑
沿流而下去約軍一里謂將士曰觀彼龍輶不動吾

軍之龍甚是踴躍卽攻之縱火舫于前面逆風不便
法和執白羽扇以麾風風卽反約衆皆見梁軍步于
水上于是大潰約逃竄不知所之法和曰明日午時
當得及期未得人問之法和曰吾前于此洲水乾時
建一剎語檀越等此雖爲剎寔是賊標今日何不自
標下求賊如其言果見任約在水中抱剎柱頭纔出
鼻遂擒之按此所言彼龍吾軍之龍意卽軍中之氣
如龍耳尚非真龍也 南史梁武帝起兵自發雍州
帝所乘艦恒有兩龍導引左右莫不見遂至進逼建

康東昏爲其下所殺以黃油裹首送軍 名賢錄云

陳禎明三年隋師濟江陳慧紀率將士三萬人舳舻
千餘乘沿江而下欲趨臺城遣南康太守呂肅將兵
據巫峽以五條鐵鎖橫江隋將楊素奮兵擊之四十
餘戰爭馬鞍山及磨刀澗以守險隋軍死者五千餘
人陳人盡取其鼻以求功賞繼而隋軍屢捷獲陳軍
上皆不殺縱之肅乃遁保延洲別帥廖世寵領大舫
詐降欲燒隋艦更決一死戰于是有五黃龍備衆色
各長十餘丈纜首連接順流而東風浪大作雲霧晦

曉陳人震駭不覺火自焚隋軍乘高艦張大弩以射之陳軍大敗風浪一時頓息肅收餘衆東走 華陽國志云武帝通博南山度瀾滄水以取哀牢地置不韋縣而哀牢轉哀建武二十三年哀牢王扈栗遣兵乘單舩南攻施芑時鹿芑弱將就擒會天大震雷疾風雨水爲逆流單船沉沒死者數千人後扈栗復遣六王攻鹿芑鹿芑王逆戰大破哀牢軍殺其六王哀牢人埋六王夜虎跑而食之哀牢大驚怖扈栗謀諸耆叟曰哀牢略微自來不如如此今輒被天誅將中國

有受命之王乎是何天祐也二十七年遣使詣越雋
太守鄭鴻言願率種人歸義奉貢世祖納之以地爲
西部屬國以王爲君長此二事則真龍虎之助軍威
者也 唐書哥舒翰築神威軍青海上吐蕃攻破之
更築丁龍駒島有白龍見因號應龍城翰相其川原
宜畜牧謫罪人二千戍由是吐蕃不敢近青海 文
獻通考云陳武帝討侯景軍頓西昌有龍見水濱高
五丈五色雲羅軍人觀者數萬人宋太祖從周世祖
征淮南戰于江亭有龍自水中向太祖奮躍識者考

異此皆龍之助軍威者也 裴松之引世語曰曹大
祖攻張魯魯欲降其弟張衛橫山築陽平城以拒師
師不得進魯走巴中軍糧盡太祖將還西曹掾郭誡
曰不可魯已降留使旣未返衛雖不同偏携可攻懸
軍深入以進必克退必不免太祖疑之夜有野麋數
千突壞衛營軍大驚其夜高祚等誤與衛衆遇祚等
多鳴鼓角會衆衛懼以爲大軍見掩遂降此又野麋
之助軍威不獨龍虎矣 晉書載記呂光征西域焉
耆王率其旁國請降龜茲王帛純距光驅徒城外人

入于城中附庸侯王各嬰城自守至是光左臂內脉
起成字文曰巨雷光營外夜有一黑物大如斷堤搖
動有頭角目光如電及明而雲霧四周遂不復見旦
視其處南北五里東西三十餘步鱗甲隱地之所昭
然猶在光笑曰黑龍也俄而雲起西北暴雨滅其跡
杜進言于光曰龍者神獸人君利見之象易曰見龍
在田德施普也斯誠明將軍道合靈和德符幽顯願
將軍勉之以成大慶光有喜色進攻龜茲城夜夢金
象飛出城外光曰此謂佛神去之胡必亡矣戰于城

西大敗之斬萬餘級帛純收其珍寶而走王侯降者三十餘國 楊升菴云周世宗征濠夜遣兵持炬乘橐駝絕淮濠兵驚以爲鬼乘龍也今名乘龍洲在鳳陽 閩書云五代時建寧陳誨生數月趨捷能馳走其父異之名曰阿鐵初爲王延政裨將唐師攻建州傅其城誨數出挑戰先鋒使王建封克其外郭擒誨將斬之已解衣伏鎖忽脫走絕馳追者數十百輩莫能及因自歸于唐將查文徽用爲戰掉指揮使領故部曲從攻福州馮延魯戰敗諸營皆潰死者萬計委

棄軍資器械不可勝算。誨獨殿後，收所棄金帛二十萬，以歸。文徽鎮建州，數表其能，授劍州刺史。諜者告吳越戍兵棄福州，遁歸。文徽卽率誨以戰艦入閩江，適秋雨，水暴漲，一夕七百里，抵城下，與吳越水軍遇，遂戰于江中。誨素善水，沒入江鑿吳越樓船，壞乃以木爲蛟龍形，湧出江面。吳越兵驚潰，遂大敗之，獲其將馬先進以功遷建州節度使。進侍中，此又借木龍以助軍威者矣。北夢瑣言云：福建道以海口黃碕嶼橫石巉峭，常爲舟楫之患。閩王王審知思

欲制置憚于力役乾寧中夢金甲神自稱吳安王伍

子許助開鑿因命判官劉山甫躬往設祭具述所夢

之事三奠未終海內靈輶俱見山甫乃憇于僧院憑

高觀之風雷暴興見一物非魚非龍鱗黃鬣赤長千

百丈凡三日風雷止霽已別開一港甚便行旅當時

錄奏號甘棠港 于逃聞奇錄云宋太宗少時帥

師戰淮人于千秋嶺大克之彼望我軍上雲氣如龍

虎之狀有識者曰此王者之氣也 南史王僧辨討

侯景發江州至益口與陳武帝會于白茅洲盟而歃

書備滿小集

血盟文辭氣慷慨皆淚下霑衿及發鵲頭中江而風浪師人咸懼僧辨自拜告天曰僧辨忠臣奉辭伐罪社稷中興當使風息若鼎命中淪請從此逝言訖風止遂泛安流有羣魚躍水飛空引導賊望官軍上有五色雲雙龍夾艦行甚迅疾景自出戰于石頭城北僧辨等大破之 剪勝野聞云 太祖在滁常濯手于栢子潭有五蛇擾而就之因祝之曰天命在予汝其永附焉一日戰畢羣坐藉土蛇忽蜿蜒其側帝乃掩以兜鍪頃復報戰亟戴兜鍪而往是日手刃甚衆

軍法戰勝必祭甲冑衆推 帝功居多乃置其堦螯

于前甫真忽霹靂大震白龍夭矯自堦螯中出挾雷

聲握火光騰空而去諸將自是畏服 宣驗記元嘉

元年建安郡山賊百餘人掩破郡治抄掠百姓子女

貲產逐入浮屠搏掠財寶先是諸供養具別封置一

室賊破戶忽有蜜蜂數萬頭從衣籠出同時蜂螯羣

賊身首腫痛眼背皆盲合先諸所抄掠皆棄而走然則

蟲類亦有能殺賊者又按拾遺記周武王伐紂夜濟

河時雲明如晝八百之族皆齊而歌有大蜂狀如丹

鳥飛集土舟因以鳥畫其旗翌日而梟紂名其舩曰
蜂舟魯哀公二年鄭人擊趙簡子得其蜂旗則其類
也可不謂之蜂助軍威乎 西域記瞿薩旦那國城
西沙磧正路有堆阜並鼠壤墳也此沙磧中鼠大如
蠅其毛則金銀異色爲其羣之首長每出穴遊止則
羣鼠爲從皆何奴率數十萬衆寇掠邊城至鼠墳側
屯軍瞿薩旦那王率數萬衆恐力不敵素知磧中鼠
奇而太神也無所圖計苟復設祭焚香詣鼠黃甘
靈夢如軍力其夜王夢大鼠謂曰敬欲相助願早治

兵王知靈祐遂整戎馬未明掩襲匈奴方欲駕乘
鎧而諸馬鞍人服弓弦甲縶凡厥帶係鼠皆嚙斷于
是殺其將殲其兵匈奴震懾王感鼠恩建祠設祭奕
世相承此又鼠助軍威之一異也 震澤事苑楚王
畋于震澤遇羣鹿千餘王令諸軍張兩翼驅鹿入大
谷谷無他道將令弓弩並發盡殪之忽一大鹿突圍
而走跪王前人言曰我鹿王也今與族類盡困於此
谷中王如盡取之則我族滅絕無遺類願大王憫而
釋之今後日獻一鹿大王可長享而我類不殲絕也

王異之遂命開道縱之大鹿跳躍而往嗚呼其群整
行而出入大山去自是日有一死鹿置王所獵處三
年王崩而止青瑣高議云此楚元王後吳侵楚萬鹿
乘月黑馳繞吳軍若萬馬奔聲吳軍驚遁楚王明日
達吳營見鹿跡無數環之一大白鹿見王敘其報恩
曲折乃立廟以旌其德名其山曰仁鹿山谷曰仁鹿
谷廟曰仁鹿廟此又鹿助軍威之一異也 宋書胡

藩從宋高祖爲散騎侍郎參軍事從征鮮卑破其所
聚臨朐賊還保廣固未拔一卒 在史並集忽有鳥

大如鷺蒼色飛入高祖帳裏衆皆駭愕以爲不祥藩
起賀曰蒼黑者胡人之色胡人歸我大吉之祥也明
且攻城陷之十國春秋南唐柴克宏當元宗時吳
越侵常州命克宏爲右衛將軍往救之時常州有隋
將陳杲仁廟夜夢杲仁見告曰吾帥陰兵助公及戰
有一黑俘衝突吳越兵輒披靡克宏勒兵繼進大破
之敵甚衆奏封杲仁爲武烈大帝

漢晉人行服

漢制公卿刺史二千石不得行三年喪至安帝時司徒劉愷以爲非所以師表百姓宜美風俗乃聽大臣行喪已而尚書令殷詡請斷之尚書陳忠上書切諫上不從竟復斷二千石以上行三年喪其于父母之喪抑何忍也又考之楊仁爲什邡令行兄喪去官譙玄適太常以弟服去職陳重除細陽令政有異化舉尤異當遷爲會稽太守遭姊憂去官此三人于兄弟姊妹之喪又何厚也其三人自行之與抑功令然與

既云公卿刺史二千石不行三年喪則公卿刺史二千石以下皆行三年喪可知也公卿刺史二千石不行三年之喪而公卿刺史二千以下者槩行兄弟姊妹之喪是遵何禮耶楊雄傳侯芭從楊雄受太玄法言雄卒芭爲起墳喪之三年後漢書司空袁逢舉荀爽有道不應及逢卒爽制服三年晉書司隸荀愷有從兄喪自表赴哀詔聽之而未下愷乃造楊駿傳咸泰日死喪之威兄弟孔懷同堂共殯方在信宿聖恩矜憫聽使臨喪詔未下便行楊駿造急詣媚

之敬無友于之情宜加顯貶以隆風教帝以駿管朝
政有詔不問駿甚憚之此乃同堂兄弟之喪也而乃
謹嚴如此 又晉劉隗爲丞相司直委以刑憲世子
文學王籍之居叔母喪而婚隗奏之東閣祭酒顏含
在叔父喪嫁女隗又奏之廬江太守梁龕明日當除
婦服今日請客奏伎丞相長史周顗等同會隗奏曰
夫嫡妻長子皆杖居廬故周景有三年之喪旣除而
晏春秋猶譏况龕匹夫朝晏暮禪慢服之愆宜肅張
紀之禮請免龕官削侯爵顗等知龕有喪吉會非禮

宜各奪俸一月以肅其違從之此皆叔父叔母及妻
之喪而皆謹嚴如此。若鄰鑒值永嘉喪亂在鄉里
甚窮餒鄉人以鑒名德傳共相飭時兄子邁外甥周
翼並小常携之就食鄉人曰吾自飢困以君賢欲共
相濟耳恐不能兼有所存鑒于是獨往食訖以飯着
兩願間還吐與二兒後並得存同過江邁位至護軍
翼爲剡縣令鑒之薨也翼追撫育之恩解職而歸席
心喪三年此則恩同于父母非常情之比三年而
又止心喪得其中矣。通志畧云漢成帝時丞相翟

方進母終既葬三十六日除服視事自以爲身備漢相不敢踰國典然而原涉行父喪三年名彰天下河間惠王行母喪三年詔書褒稱以爲宗室儀表是則喪制三年能行之者貴之矣 後漢董翊舉孝廉爲須昌令聞舉將喪棄官歸 東漢桓榮字春卿師事九江朱普普卒榮乃奔喪負土成墳 魏王朗師事楊賜卒棄官行服 郭禹師事郭荷荷卒禹服斬居廬 按檀弓事師無犯無隱左右就養無方服勤至死心喪三年史記孔子葬魯城北泗上弟子三年心

喪畢相訣而去惟子貢廬于塚凡六年斯乃聖門之
道也而漢晉人至有服斬居廬恐非先王之正道矣
薛宣爲丞相弟修爲臨淄令後母卒修去官持服
宣謂修曰三年喪人少能行之兄弟相駁不可修竟
行服兄弟繇是不和漢議郎韋義貶刺竇氏久抑
不遷以兄喪去

禽獸之類

龍蛇蟲豸皆有所歸若羽毛之族則不然至冬則各生細毛以自溫故尚書云鳥獸毳毛頤乃有不盡爾者爾雅翼云荊州每至冬月于田畝中得土堅圓如卵者輒取以賣則鷩在其中無復毛羽蓋以土自裹伏而土堅勁候春始生羽破土而出李時珍云百舌處處有之居樹孔窟穴中立春後則鳴轉不已夏至後則無聲十月後則藏蟄人或畜之冬月則死又燕營巢適戊巳日春社求秋社去其來也銜泥

巢于屋宇之下其去也伏氣蟄于窟穴之中俗謂其
渡海者謬誤也或云燕蟄于井底燕不入室是井之
虛也

李時珍曰熊如大豕而豎目人足黑色春夏臙肥時
皮厚筋弩每升木引氣或墮地自快若呼跌臙卽莊
子所謂熊經鳥伸也冬月蟄時不食食則舐其掌故
其美在掌陶弘景曰熊脂卽熊白乃背上肪色白如
玉味甚美寒月則有夏月則無然則此脂亦因其蟄
而生耳詩義云熊冬入穴而蟄至春始出

袁潛上

伏不度越阡陌又山海經論次山有橐肥狀如象人
面一足冬見夏蟄服之不畏雷然則他物之蟄以冬
而此二物獨以夏蟄爲尤異耳 山海經堯光山有
附襄狀如人面彘鬚穴居而冬蟄抵山之水不離狀
如牛陵居蛇尾有翼羽在鼈下音如留牛冬死夏生
近有流人述所聞見云傳聞壽公臺外有一國人至
則穴土而藏不食不動至春蟄後始食動如常則
人亦有蟄焉者不獨禽獸也 博物志云無啓國民
居穴食土無男女死埋之而其心不朽百年還化爲

人細民國人死其所不朽百年化爲人皆穴居處三
國同類羹門廣牘云三蠻國其人不種田只食土死
者埋之心肝肺皆不朽百年復化爲人此竟以百年
爲蜚益荒唐雞稽矣

護堤侯

吾邑有神曰張六五相公凡江湖河海並著靈異予
邑祀禱之甚虔紹興府中浙江省中迤邐而達于燕
都莫不廟貌崇煥香火輻輳士民奔趨恍惚有蜚響
勝降之感焉省志云神諱亮府志云神名夏皆未之
詳者也按邑志載王多吉集張氏先塋碑記云吳
越王時刑部尚書張亮厥後一傳護堤侯十一稅院
襲爲長山海神則前行六五者卽指十一言也是神
乃亮之裔而非卽亮也予嘗取神之子孫藏有宋時

勅書一絹素塵朽而字墨昭然可讀神果名六五而非亮亦非夏也夏則宋時已有祠祀勅封豈與六五相公爲一人哉宋葉祐翁四朝見聞錄云張日封廟號昭即景祐中張夏出爲兩浙轉運使杭州江岸率用薪土潮水衝擊不過三歲輒壞夏乃作石堤十二里以防江湖之患旣成州人感夏之功慶曆中廟于堤上嘉祐十年贈太常少卿正和二年八月封寧江侯改封安濟公併贈今額紹興十四年增靈感字紹興二十年增順濟字予以本末考之初無神怪之事

今臨安相傳以伯起治潮三年莫得其要領不勝之
憤盡抱所書牘自赴于江上訴于帝後于寓所感夢
繼是修江者始得其說堤成而潮亦退蓋真野人之
語也江之所恃者堤安有伯起不知以石代薪土之
便工未及成效匹夫溝瀆之爲此身不存而憑虛忽
之夢以告來者萬一不用其夢意常何如是尚得生
名之智歟謂之神乎沿江十二里要是上至六和塔
下至東青門正昭侯所築今顧諉之錢王則尤謬矣
清波雜誌云錢塘江邊土惡不能隄錢氏以薪爲

之水至卽潰皇祐中工部郎中張夏出使置捍江兵
五指揮專採石增修衆賴以安邦人爲之立祠朝廷
嘉其功封寧江侯 楓窻小牘云杭州江隄築自梁
開平四年八月時錢氏始霸武肅王以候潮通江二
門之外潮水衝齧版築不就命强弩數百射之潮水
爲避擊西 文遂以竹籠石植大木圍之率數歲輒復
壞祥符七年潮直抵郡城守臣戚綸漕臣陳堯佐議
累木爲岸實土藉以捍之或言非使命發運使李溥
按視十月壬戌溥請如錢氏舊制立木積石以捍潮

波從之。其後踰年堤不成。卒用薪土。天聖四年二月
辛酉。符御史方謹言。請修江岸二斗門。慶曆六年。漕
臣杜杞築錢塘堤。起官浦至沙陘。以捍風濤。浙江石
塘。郝于錢氏。景祐中。工部侍郎張夏爲轉運使。置捍
江兵。採石修塘。人爲立祠。紹興二十年。修石堤。二十
二年十一月二十五日。吏部尚書林大鼐言。潮爲吳
患。其來已久。捍禦之策。見于浙江亭碑。自江流失道。
潮與洲門。怒號激烈。千霆萬鼓。民以不寧。宜額置一
司。究利病。而後興工。乾道七年十一月十八日。帥臣

沈夏修石堤成增石塘凡九十四丈。按張之子孫

所藏勅書一道稱神爲六五太尉。一爲理宗淳佑十

一年三月二十七日封神爲顯應侯。其言有爾生有

奇證學精行誠發粟以活飢餓出力以濟婚喪族黨

歸德閭里稱仁。常言死當爲食民之不忘。相與尸祝

之水旱疾厲應禱如響。江潮爲患達祠水滸隄岸以

同等語。一爲度宗咸淳四年十月八日封神爲護隄

侯。其言有頃潮嚙江岸糜爛官金錢。畚土籠石以捍

之。包凌民田廢其收祀。越淮神之求鉅役始爲就

緒計臣立石記功。以浙壤農而宜稼。賈而利涉。廟以
英濟稱舊矣。陰陽之運。江海之態。無窮爾。能闔闢其
間。遂民之願。非英姿義概。弘以用物能然耶。等語。然
則神之德行勲蹟。載于二勅中者。皆當時之實錄。世
俗所傳怪怪奇奇之事。頗屬無稽。

分界

括地志云欽州馬援征交趾立銅柱其下以表漢界
嶺產茅草南北異向至今猶然 名勝志云洱河遶
太和縣城西南由石穴中出東所分分水崖儼如斧
割漁人謂自岸下分水爲兩南河北海鹹淡不類河
魚不入海海魚不入河魚遊至此卽返 萌渚嶠在
富川縣北與楚之江華爲界水南北分流 閩書大
田縣有分流泉陽年流右陰年流左 名山記解州
有分雲嶺雲至此東西兩分 圖經閩尤溪縣南至

泉州德化縣尤嶺爲界嶺上有分枝樹一枝南向一
枝北向此尤溪之源也 李膺益州記云漢高時巴
蜀人爭山界久而不決漢高八年一朝密霧石爲之
裂自上及下開數尺真若繩引之于是巴蜀界限始
定 宣室志云東陽郡濱于浙江有山迴圍數百里
江水曲而環焉迂滯舟楫人頗病之常侍敬昕太和
中出守其山一夕雲物晦晦暴風雷電動蕩室廬江
水騰溢莫不惶惑迨曉方霽人住視之已劈而中分
相遠數百步引江流直而貫焉其環曲處悉填以石

遂無縈繞之患 黃衷海語云分水在占城之外羅
海中沙嶼隱隱如門限延綿橫亘不知其幾百里巨
浪拍天異于常海由馬鞍山抵舊港東注爲諸番之
路南注爲珠厓儋耳之路天地設險以域華彝者也
田外羅歷大佛靈以至峴崦山自朔至望潮東旋而
西旣望至晦卽西旋而東此又海中潮汐之變 珍
珠船云長沙有銅棺山湘中記云程普關羽分界于
此共鑄銅棺爲誓相侵者以銅棺貯之 鶴慶軍民
府有諸葛泉在治南百四十里武侯駐師之地出泉

均爲三流昔人有欲兼利之者引而爲一至鷄鳴其
水復分 宋建隆三年王全斌平蜀以圖來上議者
欲因兵威復越舊藝祖以玉斧畫大渡河曰外此吾
不有也于是爲黎之極邊昔時河道平廣可通漕船
自玉斧畫後河水忽陷下五六十丈水至此澎湃如
瀑從空而落春撞號怒波濤洶湧舩筏不通名爲噎
口殆天設險以限羌狄也父老云有塞將欲載杉木
板由陽山入嘉定貿易以數片試之板至噎口爲水
所吞沒須臾片片自沫浮出蠻人益不敢窺伺矣

焦氏筆乘銅柱不止馬援吳黃武二年程普開雲長
分界鑄銅柱爲誓在衡州珍珠船以爲銅棺恐傳之
訛當以銅柱爲正又唐御史唐九徵立銅柱于黠蒼
之湍溪又五代晉與楚王馬希範立銅柱爲界學士
李臯銘在辰州地理通釋云吳會吳郡會稽郡永
建四年分會稽爲吳郡吳志朱桓部伍吳會二郡莊
子釋文云浙江爲吳會分界是也耳談云淮河分
水關適當兩都之中而水東北分注之朝于兩都蓋
皆亢地也 幽明錄宜都建平二郡之間有五六峯

參差互出上有奇石如二人像壤袂相對俗謂二郡
督郵爭界 彝堅志廬陵之西六十里有田十五其
形如斧兄弟議分而左右不等紛爭不已逆訟之官
越一二年亦無結斷忽一日黑雲四起霹靂一聲而
田中如犁畫一條自上而下畝角尺寸甚均然後兄
弟爭訟貼息至今此處名雷公田 周南林云秦順
天湖山明初旱耕者爭決致鬪忽大風震雷中分其
水爭乃息

石生石長

治世餘聞云弘治庚戌歲南昌府城隍廟殿下庭中生一石初出地四五寸越日已長尺餘以後日日漸長既數日已三四尺其初生無人覺其是石偶一人見之曰此處想生出山矣因此語遂不復長其生者至今存焉 菽園雜記成化十三年福建長樂縣平地長起一山長二日而止度之高二丈餘橫廣八丈其旁一池忽生大蜆民取食之味甚美乃爭取食食者不數月患痢死者千餘人

物理小識云石在地上有剝落在土中有生長變化
崇禎中方融啓雲居膺禪師塔碑上皆古錢有懸鏡
墮驚錢開者碑字平杳不可識錢覆者其字如故

各勝志云建昌府有綿纏石其初低小凡禱者以綿
一幕纏其上今漸高大雖綿十倍繞不能過 吉安

府禾山下爲龍門溪懸流數十丈奔厓飛瀑湧爲溪
潭最稱奇絕顏魯公大書龍溪二字刻巖上先時字
去地二丈許摹榻者必附梯緣之今字漸近平地而
巖麓無少損 秦州聖果院古井欄保大中琢舊有

晉書五行志武帝太康十年洛陽宮西宜秋里石生
地中始高三尺後如偃人縻薄不可掘惠帝元康五
年十二月有石生于宜年里

地水脉相通

名山記云廬山棲賢寺寺僧曾沒甌潭上俄失所在
後有人從湖南來云頃從洞庭湖得此甌甌上有棲
賢寺可驗故知此潭下通湖南 荊門州靈鷲山有
穴曰龍洞深五里石臺甚高春月水聲如鐘鼓管籥
聽者忘倦宋熙寧中山泉溢有髹器輒車流出字曰
嘉州蓋泉與蜀通也 南郡中有盧侯國襄陽耆舊
傳曰古盧戎縣西山中有一道漢時常有數百匹馬
出其中馬形皆小似巴滇馬三國時陸遜攻襄陽又

值此穴中有數十匹馬出逐載還建業蜀使來有五
都兵家滇池者識其馬色云云父所乘對之流涕

神僧傳云牛頭山半有洞人傳入百里與眉州通曾
有避罪者匿其中後于青神山巖見之 輿地記勝

云竹泉在荊州松滋縣南宋至和初苦竹寺僧浚井
得筆後黃山谷謫黔過之視筆曰此吾蝦蟇碣所墜

因知此泉與之相通其詩曰松滋縣西竹林寺苦竹

林中甘井泉巴人漫說蝦蟇碣試裏春茶奉就煎

蝦蟇碣

碣在興

興陵州有白馬穴水經注云西陵北崖有

石穴遠望常有白馬出入其間尋之莫覩潛行出漢中漢中人失馬亦出此穴相去數千里潛相爲通水經注云桑乾河水潛承汾陽縣北燕山之天池古老相傳常有人乘車池側忽大風飄之入水後乃獲其輪于桑乾泉故知二水泉流通注矣 北史云魏孝武帝以金珠穿七魚于池濱後于桑乾得所穿之魚又以金縷箭射池之巨鯨亦于桑乾獲之 蜀江上禪智寺側有井味極甘冽脉與蜀江相通有老僧洗鉢蜀江失之從此井浮出爲寺僧所得凡數年

老僧過而見之驚曰何緣到此脫衲衣贖歸 說畧
云昔郭緣生于河上源遇書生問之何知濟與河上
源通生曰洛水萍創正與河水之源不異物之不同
猶鉛錫也北濟既入于河性與河別不能合混滲漉
入地伏行達滎陽而遂溢爲滎耳今之歷下等處發
地悉是流水濟所過也東阿之井正濟所溢故今阿
膠止濁主吐下膈而疎痰以濟之性趨下上清而下
重故治滯濁逆上之病耳 博物志君山有道與吳
包山潛通 玉泉子云李德裕在中書常飲惠山泉

自毘陵至京置遞運舖有僧人詣謁德裕好奇凡遊
其門者雖布素皆接引僧曰德裕曰相公在中書昆
蟲遂性萬彙得所水遞一事亦日月之薄蝕微僧竊
有惑也敢以上謁欲阻此可乎德裕曰大凡爲人未
有無嗜者至于燒禾亦是所短况三惑博塞弋奕之
事弟子悉無所染而和尚不許弟子飲水毋乃虐乎
爲上人停之卽三惑馳騁怠慢必生焉僧人曰貧道
所謂相公者爲足下通常州水脉京都一眼井與惠
山泉脉相通德裕大笑曰真荒唐也井在何坊曰吳

天觀常住庫後是也。因以惠山一巖，昊天一巖，雜以
入巖一類十巖，暗記出處，遣僧辨析。僧因啜嘗取惠
山昊天，餘八瓶同味。德裕大加奇嘆。當時停水，邈人
不告勞，浮議乃興。墨客揮犀云：「福州雪峰有應潮
泉，其廣不過二三尺，水繞數寸而進退淺深，與潮候
無差。然四旁皆頑石，惟當中有數沙眼。每潮上，則涓
涓而出；潮退，復竭。故老相傳，以爲海眼。但其處高，當
山脊，不知何以能與水澤相通也。」名勝志云：「博平
縣西有靈泉，一名涵管洞。巨石甃成六管，三竅以洩。」

暴水永樂九年疏會通河其水遂塞可見水溢不在
彼則在此 馬湖府有龍湖四圍皆峻崖長二十里
廣七里中有堆如螺髻去大江二里其水與江水同
消長日夕作潮相傳曾有龍馬見于湖因以名郡
諸阜記云景公寺前街中有巨井俗呼爲八角井元
和初有公主夏中過見百姓方汲令從婢以銀稜椀
就井承水誤墜椀經月餘出于渭河 趙抃成都記
云嚴真觀漢嚴君平宅也內有井名曰通仙耆舊傳
云此井與漢州綿竹縣君平宅中井相通近歲有人

海井得銅錢三文僅可二寸因恍惚不安投錢井中
立愈或曰此君平擲卦錢 洽聞記吳太平二年長
沙大飢人多死孫權使趙達占之云天地川澤相通
如人四體鼻脚灸脚而愈今餘干水口沙暴起一洲
形如鼈食彼郡風氣可祀而掘之權乃密遣人祭以
太牢斷其背饑遂止其水在饒州餘干縣也 堯山
堂外紀云蜀興元境内有斗山觀自平川內聳起一
山四面懸絕其上方于斗底故名上有唐公昉飲李
八百仙酒全家後宅之跡其 三畝許陷爲坑並連

地而上升也王仁裕辛巳歲于此爲節度判官常以
片板題詩于觀日霞衣欲舉醉陶陶不覺全家住絳
霄板宅只知鷄犬在上天誰信路岐遙三清寥廓拋
塵夢八景雲朋事早朝爲有故林蒼柏健露華涼葉
鎖金鑰斗山一洞西去二十里通于青城大面山又
與嚴真觀井水相通仁裕癸未歲入蜀因謁嚴真觀
見斗山詩碑在焉詰其道流云不知所來當時無不
異之 一統志浙江長興縣有青山上有石竇通太
湖及洞庭山冬夏常暖色光黛青 處州鼎湖石旁

有軒轅洞卽黃帝飛昇之處洞內有軒轅像時聞潮聲相傳與錢塘江通故人不取深入 山堂肆考杭州北山有龍泓洞一名通天洞俗傳其地可通浙東